

ՀԱՅԵՐՆ ՕՍՄԱՆԵԱՆ ԲԱՆԱԿՈՒՄ

ԺԴ. ԴԱՐԻՑ ՄԻՆՉԵԻ 1918

(ՈՒՐՈՒԱԳԻԾ)

ԱՆԱՀԻՏ ԱՍՏՈՅԵԱՆ
anahitas@mail.ru

Հայ-թուրք համակեցութեան պատմութեան հարիւրամեակների ընթացքում հայերը մեծ մասնակցութիւն են ունեցել Օսմանեան կայսրութեան կեանքի տարրեր ասպարէզներին՝ իրենց ստեղծագործ միտքը, աշխատասիրութիւնը եւ շինարար ոգին ի սպաս դնելով տէրութեան գորացմանը:

Երկրի տնտեսութեան եւ մշակոյթի զարգացմանը հայերի մասնակցութեան մասին նիւթը մշակուած է ուսումնասիրութիւնների մակարդակով: Օսմանեան կայսրութեան գինուած ուժերում հայ տարրին վերաբերող նիւթերը հիմնականում ցրուած են մնում հայ պարբերական մամուլում եւ տարրեր հրատարակութիւններում: Այս յօդուածում կարելիութեան սահմաններում փորձել ենք ի մի բերել, մէկտեղել դրանք: Հայ-թուրք համակեցութեան պատմութեամբ զբաղող պատմաբաններին է թողնւում այս նիւթի առաւել մանրակրկիտ ուսումնասիրութիւնը եւ դրա ամբողջացումը՝ թուրքական եւ օտար աղբիւրներից առնուած փաստերով:

Յայտնի իրողութիւն է, որ Օսմանեան կայսրութեան տիրապետութեան տակ գտնուող բոլոր ազգերը եւ առանձնապէս քրիստոնեաները ապրել են անտանելի եւ անհանդուրժելի այնպիսի պայմաններում, ուր իւրաքանչիւր քրիստոնեայի կեանքը, ինչքը եւ պատիւը կախուած է եղել առաջին պատահած մահմեդականի քմահաճոյքից: Ենիչերին իր նոր սրուած սուրը անհաւատ քրիստոնեայի պարանոցի վրա փորձելու արտօնութիւնն է ունեցել: Քրիստոնեայ հպատակները ստիպուած են եղել համակերպուել երկրում իշխող մահմեդական մոլեռանդութեան եւ յայտնի (հօտ, ստրուկ, հարկատու) իրաւագուրկ վիճակի հետ, քանզի օսմանեան վարչակարգի դէմ ցանկացած ընդվզման փորձ կարող էր միայն մեծ աղէտների յանգեցնել իրենց: Կրօնակից որեւէ պետութեան աջակցութիւնը նրանք չէին կարող յուսալ, քանզի Օսմանեան ամենագոր կայսրութիւնը մինչեւ ԺԷ դարի վերջը սարսափի մէջ էր պահում Եւրոպայի երկրներին անգամ:

Օսմանեան կայսրութեան բանակում ծառայած հայ գործիչներից շատերը հայ սեղանաւոր ամիրաների, արքունի արհեստապետերի, օսմանեան համակարգում ծառայած պաշտօնեաներից շատերի նման իրենց դիրքը, պաշտօնական շրջանակներում ունեցած կապերը օգտագործել են հայ ազգային եւ եկեղեցական կեանքի պահպանմանը եւ յառաջադիմութեանը նպաստող արտօնագրերի ձեռքբերման համար: Նրանք նաեւ իրենց նիւթական միջոցներն ի սպաս են դրել հայրենակիցների կեանքի դժնդակ պայմանները թեթեւացնելու համար, ուստի յիշատակութեան արժանի ենք համարել նրանց ազգային գործունէութիւնը նոյնպէս:

ՀԱՅԵՐՆ ԵՆԻՉԵՐԻՒԱԿԱՆ ՉՕՐԱԳՆԴԵՐՈՒՄ

Գոյութիւն ունի այն տեսակէտը, թէ դարեր շարունակ օսմանեան բանակը հասարակ գիտութիւններից մինչեւ հրամանատարները՝ ամբողջապէս կազմուած է եղել օսմանցիներից, մահմեդական այլ ազգերից եւ մահմեդականացած քրիստոնեաներից: Կայսրութեան հպատակ քրիստոնեայ ազգերը որպէս անվստահելի տարրեր՝ չէին գիտութեամբ բանակ եւ զրկուած էին զէնք կրելու իրաւունքից եւ որ ամենակարեւորն է - ըստ շարիաթի սկզբունքների - անհաւատները չէին կարող կրօնել հաւատքի բանակում: Օսմանցիները մշտական նուաճողական պատերազմներ էին վարում, սակայն բաւարար քանակութեամբ ռազմական ոյժ չունէին, քանզի փոքրամասնութիւն էին կազմում իրենց գրաւած տարածքներում: Քրիստոնեայ հպատակների ռազմական ոյժը գործածելու եւ իրենց ռազմութի յարաճուն կարիքները բաւարարելու նպատակով՝ սուլթանական իշխանութիւնները հպատակ քրիստոնեայ բնակչութեան հանդէպ սկսեցին կիրառել մարդահարկ՝ *դելչիրմէ* (մանկահաւաք, մանկաժողով): Սուլթանական իշխանութիւնները քրիստոնեայ բնակչութիւն ունեցող նահանգներից պարբերաբար բռնութեամբ հաւաքագրում էին ամենաուժեղ, բարետես եւ առողջ մանկահասակ տղաներին եւ պատանիներին, որոնց կրօնափոխ անելուց յետոյ ուղարկում էին *աջեմի օղլան* (բառացի՝ անփորձ պատանի) կոչուած զօրամասերը: Այստեղ նրանք ձեռք բերելով ռազմական գիտելիքներ ու փորձառութիւն եւ ներշնչուելով կրօնական մոլեռանդութեամբ՝ դառնում էին ռազմարուեստին քաջամուտ, մահմեդականութեան ու սուլթանին հաւատարիմ գիտութիւններ եւ ուղարկւում են իշխանների զօրամասեր²:

Օսմանեան բանակի հիմնական ոյժը, նրա ընտրանին կազմող *ենիչերիսկան* (բառացի՝ նոր զօրք) զօրագնդերը (կանոնաւոր հետեւակ)

ստեղծուել են 1361-1363ին սուլթան Մուրադ Ա-ի (1359-1390) օրօք եւ ամբողջապէս կազմուած էին բունի մահմեդականացուած քրիստոնեաներից: Ենիշերիական գօրազնդերը սկզբում հաւաքագրուում էին ռազմագերիներից: Օսմանեան կայսրութեան կողմից նուաճուած քրիստոնեայ բնակիչները համարուում էին ռազմագերիներ եւ պարտաւոր էին վճարել *փենջ-եք* (բառացի՝ հինգից մէկը) կոչուած մարդկային հարկատեսակը, ըստ որի իւրաքանչիւր հինգ հոգուց մէկին պարտաւոր էին յանձնել օսմանցիներին՝ բանակի շարքերը համալրելու համար կամ՝ վճարել համապատասխան փրկագին: Գրաւուած տարածքների ամրագրումից յետոյ քրիստոնեաները դառնում էին օսմանեան հպատակներ եւ նրանց հանդէպ արդէն կիրաւուում էր *դելշիրմէ* համակարգը⁴:

Մանկահաւաքները Բալկանեան երկրներում կատարուել են աւելի վաղ (1395ին), քան Արեւմտեան Հայաստանում: Ըստ հայ ժամանակագիրների տուեալների՝ Արեւմտեան Հայաստանում մանկահաւաքները սկսել են 1464ից: Նախապէս դրանք կատարուել են երեք կամ հինգ տարին մէկ անգամ, իսկ ԺՁ դարից սկսած՝ իւրաքանչիւր տարին: *Դելշիրմէի* երեքդարեայ ժամանակահատուածում մանկաժողովների պարբերականութիւնը յաճախակիանում էր հենց այն պահերին, երբ Օսմանեան պետութիւնը վարում էր իր նուաճողական պատերազմները: Ժէ դարի երկրորդ կէսից մանկահաւաքների պարբերականութիւնը սկսում է անկում ապրել: Փաստագրուած վերջին մանկահաւաքը տեղի է ունեցել 1750ին⁵:

Ենիշերիական գօրազնդերը համարուում էին անպարտելի մի կազմակերպութիւն: Ենիշերիների քաջութեան եւ յանդգնութեան շնորհիւ աշխարհակալ սուլթաններին յաջողուեց ստեղծել գօրեղ կայսրութիւն եւ իրենց միահեծան իշխանութեանը ենթարկել Ասիայի, Ափրիկէի եւ Եւրոպայի ընդարձակ տարածքներում ապրող ժողովուրդներին:

Յայտնի չէ, թէ ենիշերիների ծով բազմութեան մէջ որքան է եղել զուտ հայկական տարրը: Եւ քանի որ չկան փաստացի տուեալներ՝ նրանց քանակը թուապէս հնարաւոր չէ սահմանել: Հայ ժողովրդի լաւագոյն ներկայացուցիչների բազմաթիւ սերունդներ խլուելով իրենց ազգային միջավայրից՝ ծառայել են յանուն Օսմանեան պետութեան եւ օտար կրօնի յաղթանակի:

Հայկական ծագում ունեցող ենիշերիների մէջ գտնուել են անհատներ, ովքեր իրենց քաջութեան եւ ընդունակութիւնների շնորհիւ կարողացել են բարձրագոյն դիրքեր գրաւել օսմանեան ռազմական եւ վարչական համակարգում:

Հայկական ծագում ունեցող ենիչերիներից նշանաւոր էր Ժէ. դարի ծովակալ *Սալիլ (Հալիլ) փաշան*, որն իր սխրագործութիւններով փառապանծ էջեր է թողել օսմանեան տարեգրութեան մէջ: *Սալիլ փաշան* կեսարացի հայ էր, որը մանկաժողովների ժամանակ խլուել էր իր ծնողներից եւ Կ.Պոլիս փոխադրուելով՝ հասել էր բարձրագոյն դիրքերի եւ մեծ ծառայութիւններ մատուցել Օսմանեան պետութեանը⁶: 1609ին մելիտացուոց դէմ ծովալին մարտից յաղթական դուրս գալով՝ ստացել է վեզիրի տիտղոս, այնուհետեւ նշանակուել է մեծ վեզիր: *Սալիլ փաշան* վանել է ղազախների արշաւանքը Սինոպից, նորոգել է խաղաղութեան դաշինքը Լեհաստանի եւ Աւստրիայի հետ: 1619ին կռուել է պարսիկների դէմ եւ Շահ Արասին ստիպել հաշտութիւն կնքել: 1620ին դարձեալ պաշտօնանկ է եղել եւ կրկին դարձել ծովակալ: 1621ին կռուել է Լեհաստանի դէմ: 1626-1627ին վերահաստատուել է մեծ վեզիրի պաշտօնում⁷:

Հայկական ծագում ունէր Ժէ. դարի գորավար եւ պետական գործիչ *Սիւլէյման փաշա էրմէնին* (1605-1680), որը ծնունդով մալաթիացի է եւ հայ ծնողների զաւակ: 1605ի մանկահաւաքի ժամանակ տարուել է Կ.Պոլիս, եղել է կրօնափոխ եւ անուանափոխ: *Սիւլէյման փաշան* իր բնատուր կարողութիւնների, ճարպկութեան եւ քաջութեան շնորհիւ կարողացել է հասարակ գինուորից բարձրանալ մեծ վեզիրի աստիճանի եւ դառնալ օսմանեան պատմութեան կարեւոր դէմքերից մէկը: Եղել է սուլթան Իբրահիմի (1840-1648) թիկնապահը⁸: Որոշ ժամանակ անց բարձրանում է վեզիրութեան աստիճանի, այնուհետեւ դառնում վեզիրի խորհրդական, ապա՝ վարում Կարնոյ եւ Սերաստիայի կուսակալութիւնները: Մասնակցել է Կրետէի գրաւմանը: 1644ին դարձել է մեծ վեզիր: Հրաժարուել է մեծ վեզիրի պաշտօնից՝ խոռվայոյց ժամանակներում փրկելով իր կեանքը: Երկու անգամ վարել է մեծ վեզիրի տեղապահի պաշտօնը: Եղել է էդիրնէի (Ադրիանապոլիս) արքունական պալատի վերակացուն:

Սիւլէյման փաշան ոչ առաջինն էր եւ ոչ էլ վերջինը բռնի մահմեդականացուած հայերից, սակայն թերեւս միակն էր, որը չթաքցրեց իր ազգային ծագումը եւ *էրմէնին* որպէս տիտղոս կրեց իր անուան կողքին իր կեանքի ողջ ընթացքում, անգամ՝ մեծ վեզիրի պաշտօնում⁹:

Վստահ կարելի է պնդել, որ Հալիլ, Սիւլէյման փաշանների նման բռնի մահմեդականացուած շատ հայազգիներ են փայլել գինուորական ասպարէզում, սակայն ծառայելով թրքութեանը՝ ճանաչուել են որպէս թուրք: Նրանց անունները կամ մեզ չեն հասել, կամ՝ թուրքական պատմութիւնը չի կամեցել արձանագրել նրանց ազգային ծագումը: Այդպէս

յում էին իբրև առաջամարտիկներ, ականահատներ, շինարար եւ մեքենագործ վարպետներ¹⁴ :

Հայերը որպէս վարձկաններ ծառայել են նաեւ օսմանեան ռազմա-ծովային նաւատորմում: Նրանց թիւը աւելացել է սուլթան Արղուլ Համիդ Ա-ի (1771-1788) հայազգի ծովակալ Ճեզայիրլի Հասան փաշայի ծովակալութեան շրջանում¹⁵ : Ռազմական նաւերի թնդանօթաձիգների 75 տոկոսը հայեր եւ յոյներ էին: Ռազմանաւերի անձնակազմի մէջ կային նաեւ հայ դրօշակակիրներ եւն¹⁶ :

Հասան փաշա Ղազին Ռոդոսթոյի Ս. Խաչ թաղի աղքատ հայ ընտանիքի զաւակ էր, որի ծնողները ստիպուած են եղել փոքրիկ տղային որպէս քէօլէ (ստրուկ) յանձնել Հաջի Օսման անունով մի օսմանցի վաճառականի, որ նրան Հասան անունն է տուել¹⁷ : Երկար շրջան գտնուել է Ճեզայիրում (Ալժիրում), այստեղից էլ՝ նրա մականունը: Իր արտակարգ կարողութիւնների եւ քաջութեան շնորհիւ յայտնի է դարձել որպէս ճարտար վաճառական եւ խիզախ ծովագնաց: Այնուհետեւ ծառայութեան մէջ է մտել օսմանեան ռազմա-ծովային նաւատորմում եւ նշանաւոր դարձել տէրութեանը մատուցած իր մեծ ծառայութիւններով: Մասնակցել է Մալթա կղզու պաշարմանը¹⁸ : Կրում էր ղազի (յաղթող) մականունը: Սուլթան Արղուլ Համիդ Ա-ի օրօք բարձրացել է վեզիրութեան աստիճանի եւ նշանակուել ծովակալ: Հասան փաշայի նախաձեռնութեամբ կառուցուել են օսմանեան ռազմա-ծովային նաւատորմի մեծ զօրանոցը եւ ռազմական այլ շինութիւններ: Նրա ծովակալութեան շրջանում ծաղկել է նաւաշինութիւնը¹⁹ :

Եւ այսպէս, ենիչերիների զօրաջոկատների կազմաւորման շրջանից մինչեւ ԺԸ դարի վերջը հայերը որպէս զինուոր մշտապէս ներկայ են եղել օսմանեան բանակում²⁰ :

ՀԱՅԵՐԻ ՏՈՒՐՔԸ ՕՍՄԱՆԵԱՆ ԲԱՆԱԿԻՆ

Դարերի ընթացքում մեծ չափերի է հասել կայսրութեան քրիստոնեայ հպատակների նիւթական մասնակցութիւնը օսմանեան բանակի զօրացմանը: Դա արուել է հարկերի եւ տուրքերի տեսքով ի տարբերութիւն մահմեդականների, որոնք նման ընոյթի տուրքեր չէին վճարում:

Օսմանեան կայսրութիւնում ոչ-մահմեդական հպատակներից բանակի ծառայութիւնից ազատուելու դիմաց իբրև փոխհատուցում գանձում էր ջեզլէ (գլխահարկ) կոչուող հարկատեսակը²¹ :

Ենիչերիների անհաստատ ռոճիկը տրւում էր հպատակներից գանձուող հարկերի հաշուին²² : Հպատակ ազգերի եւ առանձնապէս քրիս-

տոնեաների վրայ էր ծանրացած ռազմական հարկերի բեռը: Պատերազմների ժամանակ թուրքական ղեկավարող շրջանակները հպատակներից գանձում էին *իմտատ-ը սեֆերիէ* (օգնութիւն արշաւանքի կարիքների համար), *իմտատ-ը ճիհատիէ* (ի նպաստ սրբազան պատերազմի) ռազմական հարկերը: Քաղաղ ժամանակ ի նպաստ բանակի գանձում էր *իմտատ-ը հագարիէ* (բանակին նիւթական, պարենային օգնութիւն) կոչուող մէկ այլ ռազմական հարկատեսակ²³:

Ոչ-մահմեդականների համար ծանր հարկ էր *թերսանէ պետէյիսի* (նաւաշինարանի փոխարէն, նաւակայքի գին) կամ *քիւրէկչի պետէյիէ* (թիատուրք) կոչուող հարկը, որը գանձում էր նաւարանում չճառայելու դիմաց²⁴: Մինչեւ այս հարկի սահմանումը՝ 1610 թուականը, ենիչերիներն անարգել թիարան էին տանում զօրակոչային տարիքի ոչ-մահմեդական տղամարդկանց²⁵:

Այս հարկերից զատ, եթէ օսմանեան զօրքերը կանգ էին առնում որեւէ բնակավայրում, ապա տեղի հպատակ բնակչութիւնը պարտաւոր էր հոգալ նրանց սննդի, հագուստի, իջեւանատան եւ այլ կարիքները՝ վճարելով տարբեր անուններով հարկեր եւ տուրքեր²⁶:

Այս հարկերի եւ տուրքերի չափերը յստակ սահմանուած չլինելու պատճառով՝ դրանց գանձումը կախուած էր տեղի պաշտօնեաների կամայականութիւններից եւ քմահաճոյքից:

Ըստ օրինի ռազմական հարկերից ազատուած էին կրօնական հաստատութիւնները, հոգեւորականները եւ սուլթանական հրովարտակ ունեցողները: «Այսուհանդերձ՝ անկէ չէր կրնար խուսափիլ հայ եկեղեցին՝ իր զանազան աթոռներով եւ հաստատութիւններով: Այսպէս՝ երբ 1792ին Եգիպտոսը գրաւել էտք նափոլեոնեան բանակներն իջան ծովեզերեայ շրջանները Պաղեստինին՝ օսմանեան իշխանութիւնները տեղւոյն բոլոր քրիստոնեաները յայտարարեցին անոնց լրտեսն ու գործակիցը: Նոյնհետայն սկսաւ խժդժութիւնն ու կեղեքումը Երուսաղէմի քրիստոնեաներուն, եւ անոնց հետ՝ հայերուն նաեւ: Նախ կողոպտուեցան սաղիմաբնակներն ու անոնց կրօնական հաստատութիւնները, եւ քանդուեցան բազմաթիւ եկեղեցիներ: Անոնց հետ մեծ կորուստներու ենթարկուեցաւ Երուսաղէմի Սուրբ Աթոռը, եւ իր կրած քանդումներէն ետք՝ ենթարկուեցաւ հարիւր քսան զինուորական տուգանքի: Վանքին աւարառումէն եւ կողոպուտէն ետք՝ կործանեցան Ս. Փրկիչ Եկեղեցին, վանքին ձիթաստաններն ու պարտէզները, եւ բանակատեղիի փոխադրուեցաւ [վերածուեցաւ] մայրավանքը: Ի վերայ այսր ա-

մենայնի՝ որպէս պատերազմական ծախք՝ օսմանեան զօրավարները բռնի զուժարներ կորզեցին...»²⁷։

Ռազմաճակատի կարիքները հոգայու նպատակով օսմանցի զինուորները բռնագրաւում ու վաճառում էին նաեւ հայկական վանքերի եւ եկեղեցիների խաչերն ու աւետարանները, աւարի էին ենթարկում հայկական գիւղերն ու բնակավայրերը²⁸։

Իրենց սկզբնաւորութեան օրից Օսմանեան կայսրութեան զինուած ուժերը մնացին ռազմաճակատի գծի վրայ եւ պատերազմեցին Բիւզանդական, Պարսկական, Աւստրո-Հունգարական, Ռուսական, Անգլիական եւ Ֆրանսիական կայսրութիւնների դէմ եւ մշտապէս կարիք ունեցան նիւթական միջոցների ու այդ նպատակի համար դարերի ընթացքում խժոճութիւնների, բանութիւնների եւ ապօրինութիւնների միջոցով ահռելի չափերի դանձումներ կատարեցին կայսրութեան քրիստոնեայ նպատակներից։

ԲԱՆԱԿԻՆ ՍՊԱՍԱՐԿՈՂ ՀԱՅ ԱՐՀԵՍՏԱԻՈՐՆԵՐ

Օսմանեան կայսրութեան կազմաւորումից դեռ շատ առաջ հայերը յայտնի էին որպէս ճարտար արհեստաւորներ։ Օսմանեան կայսրութիւնում հայ արհեստաւորական դասը բազմացաւ այն ժամանակ, երբ հայերը ենթարկուեցին թալապի ճակատագրին եւ նրանց առջեւ փակուեցին պետական կեանքի շատ ասպարէզներ, քանզի կառավարելու իրաւունքը մահմեդականի մենաշնորհն էր։ Դարեր շարունակ Օսմանեան կայսրութեան ցամաքային զօրքերում եւ ռազմա-ծովային նաւատորմում մշտապէս բանակին սպասարկող հայ արհեստաւորների մի հսկայ բազմութիւն է եղել։

«Բարձրորակ արհեստաւորներ էին հայ զինագործները. նրանք պատրաստում էին սուր, հրացանի փող, նորոգում էին զէնքի այլեայլ տեսակներ։ Չէնքին եւ ռազմական գործողութիւններից, ինչպէս եւ բանակի սպասարկմանն առնչուող արհեստաւորները կազմում էին բանակի բաղկացուցիչ մասը եւ ուղեկցում էին նրան ամբողջ արշաւի ընթացքում։ Ֆերիդուն քէյի մի տեղեկութեան համաձայն՝ բանակում գործում էին ռազմական գործին առնչուող հազարաւոր թամբագործներ, դերձակներ, երաժիշտներ եւ բազմաթիւ այլ արհեստաւորներ։ Բանակին ծառայող արհեստաւորները եւ առետրականները ազատում էին հարկերից, որը արհեստաւորների համար նիւթական յաւելեալ հնարաւորութիւններ էր ստեղծում»²⁹։

1571ի Կիպրոսի գրաւման ժամանակ օսմանեան բանակին ուղեկցում էին ռազմական շինութիւններ կառուցող բազմաթիւ հայ շինարարներ, քարագործ վարպետներ, հիւսններ եւ այլ արհեստաւորներ: 1669ին Կրետէ մտած օսմանեան գորքին ընկերակցող մեծաթիւ հայ արհեստաւորներին ուղեկցում էր նոյնիսկ Տ. Յակոբ անուևով քահանայ՝ քահանայագործելու համար³⁰:

Էւլիա Չելեպին իր *Ուղեգրութիւնի* մէջ յիշատակում է, որ ժէ. դարում կեսարացի հայերի պատրաստած ականներով էր օսմանեան բանակը պայթեցնում թշնամիների պարիսպներն ու բերդերը³¹:

Պատերազմների ժամանակ հայ բնակչութիւնը ստիպուած էր աշխատել բերդերի, ճանապարհների շինութեան կամ վերանորոգման վրայ: Այդ մասին են վկայում հայերէն ձեռագրերի բազմաթիւ յիշատակարաններ: Այսպէս, 1556ին ումն Հիւսէյին փաշայի հրամանով Վանի եւ Արճէշի հայ բնակչութիւնը անվարձալատոյց աշխատանքով մէկուկէս տարուայ ընթացքում կառուցեց ռազմական ամրութիւններ³²:

Օսմանեան կայսրութեան վառօդարանները (զինագործարանները), որոնք վառօդ էին պատրաստում օսմանեան ողջ բանակի համար եւ այդ օրերին բացառիկ կարեւորութիւն ունէին երկրի համար՝ շուրջ մէկ դար պատկանում էին Տատեան ամիրայական տոհմի անդամներին: Նրանք փայլեցին իրենց գիւտարարութեամբ եւ մասնագիտական հմտութեամբ եւ վառօդարանը վերածեցին երկրի լաւագոյն եւ օրինակելի պետական հաստատութեան: Բազմաթիւ գիւտերի հեղինակ Առաքել ամիրան (1753-1812) որպէս ճարտար մեքենագործ հետզհետէ կատարելագործել է վառօդի արտադրութիւնը: Իր հնարամտութեամբ պատրաստել է անիւււոր նաւ եւ զանազան այլ մեքենաներ³³: Առաքել ամիրայի մահից յետոյ նրա տեղը զբաղեցրել է զաւակը՝ Միմոն բէյ Տատեանը (1770-1832), որը վառօդարանում ցուցարբերել է մեծ հմտութիւն եւ ձեռներէցութիւն: Նրա օգնականն էր կրտսեր եղբայրը՝ Յովհաննէս բէյը (1798-1869), որ երկրի ռազմական արդիւնաբերութիւնը կատարելագործելու նպատակով երկու անգամ մեկնել է Եւրոպա: Յովհաննէս բէյը գնահատուել է եւրոպական գիտական շրջանակներում՝ ընտրուելով Լոնդոնի, Փարիզի, Էդինբուրգի մի շարք ընկերութիւնների պատուոյ անդամ: Սան-Ստեֆանոյի վառօդարանի վերատեսչութիւնը յանձնուած էր Պօղոս բէյ Տատեանին (1800-1863), որ Յովհաննէս բէյի մահից յետոյ նոյնպէս վարել է Կ.Պոլսի վառօդարանը: Տատեանների պատրաստած վառօդը չէր գիջում եւրոպականին: Այն բարձր է գնահատուել Ղրիմի պատերազմի ժամանակ՝ անգլիացի եւ ֆրանսիացի զօրավարների կողմից:

Տատեանները ղեկավարել են նաեւ երկրի թղթի արդիւնարեւութիւնն ու բանակի հանդերձաւորման գործը: Ռազմական նախարարութեան ստեղծմամբ վերացաւ վառօդարանը, սակայն Տատեան տոհմի շառաւիղները շարունակեցին ծառայել երկրին եւ որպէս բարձրաստիճան պաշտօնեաներ՝ պահպանեցին իրենց ազդեցիկ դիրքն արքունիքում: Տատեանները բացառիկ դեր կատարեցին ինչպէս պետական, այնպէս էլ ազգային կեանքում: Նիւթապէս սատարել են Կ.Պոլսի եկեղեցիներին եւ դպրոցներին, գործուն մասնակցութիւն են բերել պոլսահայ համայնքի կեանքին: Նրանք ազգին մատուցած ծառայութիւններով պատուաւոր տեղ ունեն Կ.Պոլսի հայ համայնքի պատմութեան մէջ³⁴:

Հայ զինագործ վարպետներն էին պատրաստում ենիչերիների զէնքերը: Կ.Պոլսում մեծ հռչակ ունէին կարնեցի զինագործները: Զինագործ վարպետ Սարգիս Աճէմեանը արուեստի մակարդակի էր հասցրել զինագործութիւնը: Նա էր պատրաստում սուլթան Մահմուդ Բ-ի (1806-1839) սրերը: Սարգիս Աճէմեանի աշխատանքները ցուցադրուած են Ստամբուլի Թոփագափուի պալատում, Նիւ Եորքի Մետրոպոլիտէն եւ Աթէնքի Բենաքի թանգարաններում³⁵:

Օսմանեան ռազմականների վարպետները հիմնականում հայեր եւ յոյներ էին: Կայսրութեան նաւարանի դարբնապետութեան պաշտօնը ԺԸ-ԺԹ դարերում յանձնուած էր Տեմիրճիպաշեան ընտանիքին: Մուստաֆա Գ-ի (1758-1773) գահակալութեան առաջին տարիներին Գէորգ Տեմիրճիպաշեանը դառնում է արքունի նաւատորմի նաւայարդարապետը եւ թնդանօթարանի վերատեսուչը, որը նախկինում վարում էր հայազգի Մարտիրոս վարպետը: Գէորգը փայլել է իր գիւտարարութեամբ: Նա է հնարել նաւի աշտմեան խարխալը, որը եւրոպացիների կողմից գնահատուելով՝ գործածութեան մէջ է դրուել: Գէորգի ձեռքով դարբնած խարխալը աւելի քան մէկ դար՝ մինչեւ Ի. դարի սկիզբը՝ ցուցադրուած մնաց օսմանեան նաւատորմի հրապարակում³⁶: Գէորգը կրում էր պոսանճը-պաշը տիտղոսը: Սա ենիչերիական մի կարգ էր եւ իր ենթակայութեան տակ ունէր 4000 ենիչերի: Գէորգի մահից յետոյ նրա գործը շարունակել են զաւակները: Տեմիրճիպաշեան տոհմից Ենոփքը զբաղուել է նաեւ արքունի նաւատորմի, ցամաքային զօրքերի եւ պալատի հացի մատակարարման գործով: Ենոփք Տեմիրճիպաշեանը ազգային կեանքում յայտնի է նախ որպէս Գերագոյն Ժողովի, այնուհետեւ Ազգային Սահմանադրութեան հիմնադիրներից մէկը³⁷:

Թուրքիոյ եւ Մերձաւոր Արեւելքի առաջին թատրոն-կրկէսի՝ Արամ-
եան թատրոնի հիմնադիր Յովհաննէս Գասպարեանի հայրը՝ դարբին
Հաջի Գասպարը օսմանեան թնդանօթարանի վերատեսուչն էր³⁸ :

Օսմանեան բանակում հայ արհեստաւորների կատարած դերի մա-
սին պատկերացումն ամբողջացնում է սովետական դեսպան Ա. Ի. Արա-
լովի պատմածը: 1922ին Մուստաֆա Քեմալի վարած պատերազմական
գործողութիւնների ժամանակ նա այցելել է դարբինների զինուորական
դպրոց եւ զարմացել, որ Անատոլիայում թուրքերը չեն ունեցել իրենց
դարբինները: Զիեբին մշտապէս պայտել են հայ եւ յոյն արհեստաւորնե-
րը: Եւ քանի որ, բնաջնջուել կամ երկրից վտարուել էին հայերն ու յոյնե-
րը՝ ձիերը ոչ-պիտանի էին դարձել անորակ պայտումների պատճառով:
Եւ ահա, բանակում ստեղծուել էին կարճատեւ դպրոցներ՝ դարբնի ար-
հեստը թուրքերին սովորեցնելու համար³⁹ :

ԲԱՆԱԿԻ ՀԱՅ ՄԱՏԱԿԱՐԱՐՆԵՐ

Օսմանեան բանակի հիմնական մատակարարները հայ վաճառա-
կաններն էին: ԺԲ. դարից սկսած հայերը կարեւոր ոյժ էին միջազգային
առեւտրում, քանզի նրանք էին Ասիայի եւ Եւրոպայի վաճառականու-
թեան մեծագոյն միջնորդը: Հայ առեւտրականները խիզախ էին, նախա-
ձեռնող եւ սովոր յաղթահարելու ամէն տեսակի դժուարութիւն: Օս-
մանեան կայսրութիւնում հայերի առեւտրական դառնալու պահանջը ի
յայտ էր գալիս այն իրողութիւնից, որ օսմանցիները, լինելով պաշտօն-
եայ կամ զինուորական, մեծ կարիք չէին զգում առեւտրական կամ ար-
հեստաւոր դառնալու: Առեւտրով եւ արհեստով զբաղուելը նրանք հա-
մարում էին անարգ եւ ստորին զբաղմունք՝ վայել միայն ստրուկներին
եւ գերիներին: Այդ մտայնութեամբ առեւտուրն ու արհեստները թող-
նուած էին կայսրութեան ոչ-թուրք տարրերին⁴⁰ :

Մեծահարուստ վաճառական Յովհաննէս Բէյ Պանագատը սուլթան
Մուրադ Դ-ի (1622-1639) զօրարանակի պարէնի մատակարարն էր:
1638ին նա մասնակից է եղել օսմանեան բանակի կողմից Բաղդադի
գրաւման համար տեղի ունեցած ճակատամարտին: Իր ծառայութիւն-
ների համար սուլթանը նրան շնորհել է պատուանշաններ, բէյութեան
տիտղոս եւ Կիլիկիոյ հայկական Ս. Պաշ, Նուշաւան, Օշնաշէն գիւղերը⁴¹ :

Արրահամ չելեպի Ապրոյեանը 1646ի Կրետէի գրաւմանը մասնակցող
օսմանեան բանակի մատակարարն էր⁴² : Բանակին մատուցած ծառա-
յութիւնների համար սուլթան Իբրահիմի (1639-1648) յատուկ հրովար-
տակով Արրահամին շնորհուել է ամբողջ կայսրութիւնում ազատ առեւ-

տուր անելու արտօնութիւն: Մեծ եպարքոս Քէօփուրլի օղլու Մեհմէդ փաշայի հրամանով նրան շնորհուով է շելեպի պատուանունը: Օսմանեան կայսրութեան պետական շրջանակներում ունեցած իր ազդեցութիւնն Արրահամ (Ապրո) Չելեպին օգտագործել է ազգօգուտ նպատակների համար: Նա Կրետէ կղզում հայերի համար տեղարնակներից գնել է Ս. Յովհաննու Կարապետ եկեղեցին, իր կալուածքներով: 1666ին Ապրո Չելեպին տեղափոխուել է Կ.Պոլիս եւ իր սեփական միջոցներով վերանորոգել հրդեհի պատճառով վնասուած Ս. Նիկողայոս եւ Ս. Սարգիս եկեղեցիները: Յամառ ջանքերի շնորհիւ կարողացել է օսմանեան իշխանութիւններից ստանալ Մակեդոնիայում հայերի մշտական բնակութեան եւ եկեղեցի ունենալու արտօնութիւնը⁴³:

Մանուկ բէյ Միրզայեանը (1769-1817) օսմանեան Դանուբեան գօրքի հրամանատար Մուստաֆա փաշա Բայրաքդարի խորհրդականն էր: 1806-1812 ռուս-թուրքական պատերազմի ժամանակ օսմանեան գօրքի պարէնաւորումը եւ ռազմական նշանակութիւն ունեցող կառոյցների նորոգութեան գործը յանձնուած էր Մանուկ բէյին: Բացի այդ, Բայրաքդարը նրան էր լիազօրել հաշտութեան բանակցութիւններ վարել ռուսների հետ: Այս մեծ դիւանագէտի եռանդուն ջանքերի շնորհիւ են կայացել ռուս-թուրքական հաշտութեան բանակցութիւնները, որի արդիւնքում 1812ին կնքուել է Բուխարեստի հաշտութեան պայմանագիրը, որով եւ ձախողուել են այս երկու պետութիւններին պատերազմի ներքաշելու Նապոլէոն Բոնապարտի ծրագրերը⁴⁴: Մանուկ բէյը աջակցել է Մուստաֆա փաշա Բայրաքդարին՝ տապալելու ենիչերիների վարչակարգը: Վերջինիս իրականացրած յեղաշրջմամբ ետ մղուեցին կայսրութեանը սպառնացող վտանգները եւ 1808ին գահ բարձրացաւ երկրում բարենորոգչական շարժման սկզբնաւորող Մահմուդ Բ-ը: Օսմանեան տէրութեանը մատուցած ծառայութիւնների համար Միրզայեան Մանուկ բէյը սուլթանից ստացել է Մոլդովայի իշխանի տիտղոսը եւ նշանակուել պալատի դրագոմանի (դիւանագիտական թարգման՝ արտաքին գործոց նախարարի օգնականի մակարդակով) պաշտօնում⁴⁵:

Ղրիմի պատերազմի (1853-1856) ժամանակ խարրերդցի Հաջի Օհան Եաղճեանը ստանձնել էր օսմանեան բանակի պարէնաւորման գործը: Բանակին մատուցած ծառայութիւնների համար սուլթանի կողմից կանչուել է Կ.Պոլիս եւ արժանացել մեծարանքների, պատուանշանների, պաշտօնական սրի եւ համազգեստի: Կ.Պոլսից վերադառնալուց յետոյ իր հետ բերել է Քեսիրիկ գիւղի եկեղեցու եւ վանքերի վերաշինութեան արտօնագրերը⁴⁶: Սերաստացի յայտնի վաճառական Յարութիւն Պալազ-

չեանը Ղրիմի պատերազմի ժամանակ նոյնպէս զբաղուել է օսմանեան բանակի մատակարարման գործով⁴⁷։ Յարութիւն Ասլանեանը (1852-1917) եղել է օսմանեան Ծովալին նախարարութեան մատակարարը։ Նա վարել է նաեւ ծովալին երթելեկութեան խտարիէ մախաուսէի (պետական յատուկ սպասարկութեան) վարիչի պաշտօնը։ Ունեցել է ազգային գործունէութիւն⁴⁸։ Գրիգոր Շապանեանը 1865ին վարել է արքունի զօրքերի պէտքերի եւ պարէնի, ընդհանուր պաշարների մատակարարի պաշտօնը։ 1877-1878 ռուս-թուրքական պատերազմի տարիներին Օսմանեան ընդհանուր բանակի պէտքերը հոգացող մասնաժողովի անդամ է նշանակուել եւ իր պաշտօնական պարտականութիւնների կատարման համար արժանացել է շքանշանների ու ունեցել պաշտօնի բարձրացում⁴⁹։ Խարրերդցի յայտնի վաճառական Պօղոս Իզնատիոսեանը ժ.թ. դարի 70-80ականներին զբաղուել է օսմանեան բանակի հանդերձանքի մատակարարման գործով⁵⁰։ Յայտնի բարերար Արիկ Ունճեանի վրայ էր դրուած օսմանեան Բ. զօրարանակի, իսկ այնուհետեւ Ռազմական նախարարութեան ընդհանուր պաշարների մատակարարի պաշտօնները⁵¹։

ՀԱՅ ԶԻՆՈՒՈՐԱԿԱՆ ԲԺԻՇԿՆԵՐ

Թէ՛ Թանգիմաթի (1839 թ.) ընձեռած հնարաւորութիւնների շնորհիւ, եւ թէ՛ երկրում թուրք բժիշկների սակաւութեան պատճառով՝ Եւրոպայի համալսարաններում ուսանած հայ բժիշկները սկսեցին ծառայել օսմանեան բանակում։ 1841ից սկսած ոչ-մահմեդականներին արտօնուեց ուսանել Կայսերական Զինուորական Բժշկական Վարժարանում (ԿԶԲՎ), որը բացուել էր 1838ին սուլթան Մահմուդի արքունի բժիշկ Մանուէլ Շաշեանի նախաձեռնութեամբ⁵²։ Վարժարանը համապատասխանում էր իր ժամանակի գիտական պահանջներին եւ գործում էր եւրոպական համալսարանների կրթական ծրագրով։ Վարժարանի ուսուցչապետն էր Վիեննայի Համալսարանից հրաւիրուած դոկտոր Բերնարը։ Դասաւանդումը մինչեւ 1869 թուականը կատարուում էր ֆրանսերէն։ Իր սկզբնաւորութեան առաջին շրջանից ԿԶԲՎի սիւներն էին հայ, յոյն եւ ֆրանսիացի դասախօսները։ Այս եւ 1865ին բացուած Քաղաքային Բժշկական վարժարանները ունեցել են 21 հայ բժիշկ-դասախօսներ։

ԿԶԲՎի ընթացաւարտ բժիշկներն ու ղեղազործները զինուորական աստիճաններով ծառայեցին օսմանեան բանակում⁵³։ Նրանք մասնակցել են օսմանեան բանակի ռազմական գործողութիւններին ու պատերազմներին եւ իրենց մեծ աւանդն են բերել բանակում բուժսպասարկման գործի կազմակերպմանը։ Հայ զինուորական բժիշկներից շատերը

դասաւանդել են ԿԶԲՎում՝ օսմանեան բանակի եւ երկրի համար պատ-
րաստելով բժիշկներ ըստ սերունդներ: Նրանց նախաձեռնու-
թեամբ հիմնուել է Կայսերական Բժշկական Ընկերութիւնն (ԿԲԸ) ու
Կարմիր Մահիկը: Հայ բժիշկներից աւելի քան 170 բարձրաստիճան սպա-
ներ արժանացել են փաշայի եւ թէփ տիտղոսների:

Փաշայի տիտղոսին էին արժանանում միւշիթի զինուորական աստի-
ճան ունեցողները, որը համապատասխանում էր մարշալի աստիճանին
(մարաջախտին): *Յերթները* եւրոպական բանակների զօրաբաժնի
(division) եւ կիսաբաժնի (brigade) զօրավարներն էին: *Պէյլէրպէյն*,
միրլիւան եւ *միրմիրանը* օսմանեան բանակի յատուկ զինուորական աս-
տիճաններ էին: *Պէյլէրպէյն* համապատասխանում էր ըղեշխութեան,
միրլիւան՝ զօրապետութեան, իսկ *միրմիրանը*՝ հրամանատարութեան
աստիճաններին⁵⁴: Դրանց յաջորդում էր *միրալաթ* (գնդապետ), որը թէ-
փ տիտղոսն էր ունենում⁵⁵:

Անդրանիկ փաշա Կրճիկեան (1819-1894)

1855-1856 տարեշրջանում սովորել է Կ.Պոլսի ԿԶԲՎում եւ աւարտել
հարիւրապետի աստիճանով: Բնագիտութիւն է ուսումնասիրել Փարիզի
համալսարանում: Որոշ ժամանակ Անգլիայում եւ Իտալիայում իր մաս-
նագիտութեան մէջ հմտանալուց յետոյ՝ վերադաձել է Կ.Պոլսի եւ 1874ից
մինչեւ իր կեանքի վերջը բնագիտութիւն դասաւանդել ԿԶԲՎում եւ
Քաղաքային Բժշկական Վարժարանում: Մի շրջան եղել է Բժշկական
Քաղաքային Վարժարանի ներքին տնօրէն եւ այդ պաշտօնում ունեցել է
բացառիկ բեղուն եւ օգտաշատ գործունէութիւն: Իր պարտականու-
թիւններին գիտակից ու անձնուէր ուսուցիչը հակառակ իր յառաջացած
տարիքին՝ շարունակել է դասախօսել: Երկար շրջան նրա պատրաստած
բնագիտութեան երկհատոր դասագրքերով են ուսանել թուրք ուսանող-
ները⁵⁶: 1884ին զինուորական աստիճանի բարձրացումով՝ արժանանում
է փաշայի տիտղոսի:

Մասնակցութիւն է ունեցել ազգային կեանքին: 1863ին եւ 1876ին
ընտրուել է Քաղաքային Ժողովի անդամ եւ ատենադպիր: Հեղինակն է
Առողջապահութիւն եւ *Առողջ Ապրելու Մասնաւոր* եւ *Ընդհանուր Կա-
նոններ* գրքի⁵⁷:

Ստեփան փաշա Ասլանեան (1822-1901)

1846ին սուլթան Արղուլ Մեջիդի ներկայութեամբ յանձնուել են Կ.
Պոլսի ԿԶԲՎի շրջանաւարտների վկայականները: Նրանցից ամենալա-
ւագոյնը՝ Ստեփան Ասլանեանը եւ մի քանի նորաւարտ բժիշկներ սուլ-
թանի հրամանով ուղարկուել են Վիեննա՝ իրենց մասնագիտական ու-

սոււմը կատարելագործելու: Ստեփան Ասլանեանը 21 տարի դասաւանդել⁵⁸ է ԿԶԲՎում, որի ամենափայլուն դասախօսներից մէկն էր՝ փայլուն իր բացառիկ դասախօսութիւններով, մասնագիտական խորը իմացութեամբ ու հմտութեամբ: 1870ին բարձրացում է միջլիւայի աստիճանի, արժանանում փաշայութեան տիտղոսին եւ փոխադրում Ռազմական նախարարութիւն եւ դառնում Զինուորական կենտրոնական Մեծ Ժողովի Առողջապահական Բաժնի անդամ: Արժանացել է Օսմանիէի եւ Մեջրղիէի տարրեր աստիճանի շքանշանների եւ օտար երկրների կառավարութիւնների պատուանշանների⁵⁹:

1878ի ռուս-թուրքական պատերազմի ժամանակ, երբ ռուսական բանակը հասել էր Ադրիանապոլիս՝ մեծ եպարքոս Սաւֆէթ փաշան գնում է այնտեղ՝ նախնական դաշնագրութիւն կնքելու: Ստեփան փաշա Ասլանեանն իրրեւ բժիշկ-թիկնապահ ընկերակցել է մեծ եպարքոսին: Ներսէս Պատրիարքի ու բժիշկ եւ հասարակարան գործիչ Սերովրէ Վիչէնեանի (Սերվիչէն) խնդրանքով աշխատել է Ռուսական տէրութեան ուշադրութիւնը հրաւիրել հայ ազգի վրայ եւ ջանացել Սան-Ստեֆանոյի պայմանագրի մէջ դնել 18րդ յօդուածը, ըստ որի Օսմանեան կայսրութեան հայկական գաւառների բարեկարգութեան հարցը դրւում էր Ռուսաստանի վրայ:

Ստեփան փաշա Ասլանեանը գործուն մասնակցութիւն է ունեցել ժԹ. դարի երկրորդ կէսի արեւմտահայութեան հանրային կեանքին: Թէեւ նա Ազգային Սահմանադրութեան հեղինակներից չէր, սակայն լուռ եւ ծածուկ աջակցել է խմբագրական յանձնաժողովին: Ընտրուել է ազգային երեսփոխան, եղել Ազգային Ընդհանուր եւ Քաղաքական ժողովների ատենապետ: Մինչեւ 1891 անդամակցել է նաեւ այդ ժողովներին եւ ունեցել արդիւնաւէտ գործունէութիւն: Աւելի ուշ, նա ամբաստանուել է թուրքերի կողմից իրրեւ օսմանեան գահի դաւաճան եւ շնորհազուրկ եղել: Հրաժարուելով գինուորական ասպարէզից՝ կամովին աքսորուել է Եգիպտոս, ապա՝ Յրանսիա: Եգիպտոսում եղել է խրատի (փոխարքայի) ընտանեկան բժիշկը: Միայն Յարութիւն փաշա Տատեանի միջնորդութեան շնորհիւ է կարողացել վերադառնալ Կ.Պոլիս⁶⁰:

Գարրիէլ փաշա Սեւեան (1822-1900)

Օսմանեան ռազմա-ծովային նաւատորմի առաջին հայ գինուորական բժիշկն էր: 1849ին փայլուն քննական արդիւնքներով աւարտել է Կ.Պոլսի ԿԶԲՎը: Եղել է սիրիական ափերում տեղակայուած կայսերական ռազմա-ծովային նաւատորմի գլխաւոր բժիշկը: Որպէս բժշկապետ տարրեր մարտանաւերում մասնակցել է ռազմական գործողութիւննե-

րի: Հմուտ եւ բազմափաստակ հայ բժիշկը տէրութեանը մատուցած ծառայութիւնների համար հասել է միջոյնացի գինուորական աստիճանի եւ արժանացել փաշայութեան տիտղոսի: 1865ի Հնդախտի մեծ համաճարակի վերացմանն ուղղուած իր արդիւնաւէտ գործունէութեան համար արժանացել է սուլթանական գնահատութեան եւ պարգեւատրուել Օսմանիէի եւ Մեջիդիէի տարրեր աստիճանների շքանշաններով: Անդամակցել է Կ. Պոլսոյ ԿԲԸին, Ռազմա-ծովային Նաւատորմի Բժշկական եւ Բարձրագոյն Դրան Առողջապահական Կայսերական խորհուրդներին: Օսմանեան կայսրութեան Կարմիր Մահիկի հիմնադիրներից է⁶¹: Հեղինակ է գիտական աշխատութիւնների, եւ ունեցել է գրական եւ հասարակական գործունէութիւն: Վարել է Կ. Պոլսի Ս. Գրիգոր Լուսաւորչեան Վարժարանի հոգարարութեան ատենապետի պաշտօնը: 50 տարի Օսմանեան տէրութեանը ծառայելուց յետոյ 1897ին Գարրիէլ փաշա Սեւեանը հանգստի է կոչուել⁶²:

Կարապետ փաշա Իսկենտէրեան (1835-1910)

Աւարտել է Կ. Պոլսի ԿԶԲՎՂ՝ հազարապետի աստիճանով: Դասաւանդել է նոյն վարժարանում: Եղել է Սելանիկում տեղակայուած Օսմանեան բանակի բժշկապետը⁶³: Հասել է միջոյնացի աստիճանի եւ արժանացել փաշայի տիտղոսի, Մեջիդիէի Դ. եւ այլ շքանշանների⁶⁴:

Տիգրան փաշա Փեշտիմալճեան (1837-1894)

Մանազիտական կրթութիւնը ստացել է Փարիզի Բժշկական Համալսարանում: Սուլթան Արղուլ Համիդ Բ. ն (1876-1909) գնահատելով Տիգրան Փեշտիմալճեանի բժշկի տաղանդը՝ նրան դարձրել է իր խորհրդատու բժիշկը: 1869ին ընտրուել է ԿԲԸի անդամ: Յետագայում վարել է նախագահի պաշտօնը: Անդամակցել է նաեւ Ֆրանսիայի Առողջապահական Ընկերութեանը: Զինուորական աստիճանի բարձրացումով արժանացել է փաշայի տիտղոսի: Իր խղճամիտ գործունէութեան համար գնահատուել է թէ՛ ազգային եւ թէ՛ պետական շրջանակների կողմից: Տիգրան փաշա Փեշտիմալճեանը հայ վերածննդի ամենապայծառ դէմքերից էր⁶⁵: Մշտապէս սատարել է ազգային բարեսիրական հաստատութիւններին եւ յատկապէս գուրգուրանքով է վերաբերուել իր ծննդավայր Խասգիւղի Ս. Ներսէսեան Վարժարանին: Աշխատակցել է Կ. Պոլսի ու Կովկասի հայ մամուլին: Որպէս հրապարակագիր Արեւելք, Մասիս եւ Փարոս Հայաստանի պարբերականներում հրատարակել է Արեւմտեան Հայաստանի եւ Կիլիկիայի տնտեսական զարգացման հեռանկարներին առնչուող յօդուածներ: Հրատարակել է նաեւ բժշկութեանը նուիրուած աշխատութիւններ⁶⁶:

Վահան փաշա Մանուէլեան (1847-1902)

Վահան փաշան որդին է համբաւաւոր գիտնական Յակոբիկ Մանուէլեանի: 1872ին աւարտել է Կ. Պոլսի ԿԶԲՎն: Այնուհետեւ կառավարութեան կողմից ուղարկուել է Փարիզ՝ մասնագիտական ուսումը կատարելագործելու⁶⁷: 1880ին կարգւում է Կ. Պոլսի Ախտարանական Բուժարանի ուսուցչապետ Միքայէլ Խորասանճեանի օգնական բժիշկը: Փորձառու եւ հմուտ դասախօսի յատկութիւններով օժտուած Վահան Մանուէլեանը եղել է ԿԶԲՎի առաջնակարգ մանկավարժներից: Եղել է պալատական բժիշկ եւ թուրք աւագանու մօտ մեծ հռչակ եւ համբաւ է վայելել⁶⁸: 1900ին հասել է միրյիւայի աստիճանի եւ ստացել փաշայի տիտղոս: Երկար տարիներ Գուգկունճուկի եւ Օրթագիւղի Թաղական Խորհուրդների ատենապետն էր⁶⁹:

Անտոն փաշա Նաֆիլեան (1834-1912)

1854ին հարիւրապետի աստիճանով աւարտում է Կ. Պոլսի ԿԶԲՎն: Ղրիմի պատերազմի ժամանակ ծառայել է օսմանեան բանակում, իսկ այնուհետեւ ծառայութիւնը շարունակել է Կրետէում: 1858ին մեկնել է Փարիզ եւ ուսումը շարունակել տեղի Բժշկական համալսարանում: 1863ին վերադարձել է Կ. Պոլսի եւ նշանակուել սուլթանի անձնապահ գնդի բժիշկ: 1869ին ծառայութեան մէջ է մտնում ԿԶԲՎի մաս կազմող Հայդարփաշայի հիւանդանոցում: 1877ին ուղարկւում է թուրք-սերբական ռազմաճակատ: 1887ին սուլթանական հրամանով Անտոն Նաֆիլեանը ԿԶԲՎի թուրք ուսանողների ստուար մի խմբի բժշկութեան տարրեր ճիւղերում հմտացնելու նպատակով՝ տանում է Փարիզ: 1891ին վերադառնում է Կ. Պոլսի եւ ծառայութեան անցնում Հայդարփաշայի զինուորական հիւանդանոցում, որպէս բժշկապետ: Անտոն փաշան երբեք չի դասախօսել Կ. Պոլսի ԿԶԲՎում, սակայն հիւանդանոցներում հիւանդների կողքին վարժարանի ուսանողներին դասաւանդել է գործնական վիրարութութիւն: Երկու անգամ ընտրուել է ԿԲԸի անգամ: 1887ին բարձրացել է Ֆերիքի աստիճանի եւ արժանացել փաշայութեան տիտղոսի: Սուլթանական հրամանագրով արժանացել է Մեջրիէի, Օսմանիէի տարրեր կարգի ակնառու պատուանշանների⁷⁰:

Տիրան փաշա Փափագեան (1858-1926)

1882ին աւարտել է Կ. Պոլսի ԿԶԲՎն: Ծառայել է զինուորական տարրեր հիւանդանոցներում եւ աստիճանաբար ունենալով զինուորական աստիճանի բարձրացում՝ արժանացել է փաշայի տիտղոսի: 1912ին Բալկանեան պատերազմի ժամանակ ծառայել է Ռոդոսթօ եւ Քրքլարիլի քաղաքներում տեղակայուած ճակատային հիւանդանոցներում: Յետա-

գայ տարիներին գտնուել է Բաղդադում եւ Դամասկոսում՝ իբրեւ բժշկապետ օսմանեան Գ. գորարանակի: Ա. աշխարհամարտի աւարտից յետոյ հանգստի է կոչուել⁷¹:

Տիգրան փաշա Պապայեան (1861-1939)

1882ին աւարտել է ԿԶԲՎն: Եղել է արքունի բժիշկ: 1893ին Բեռլին մեկնած կառավարական պատուիրակութեան կազմում էր: 1902ին ստացել է միւրմիւրանի գինուորական աստիճան եւ փաշայի տիտղոս: Անդամակցել է Ս. Փրկիչ Ազգային Հիւանդանոցի հոգարարձութեանը⁷²:

Յակոբ բէյ Տաւուտեան (Տաւուտ բէյ) (1813-1878)

1832ին ուսանել է Պիզայի Բժշկական Համալսարանում, ապա վիրաբուժութիւն ուսումնասիրել Փարիզի Բժշկական Համալսարանում: 1840ին վերադարձել է Կ.Պոլիս եւ դասախօսական պաշտօնի անցել ԿԶԲՎում: 1856ին ընտրուել է ԿԲԸի անդամ⁷³: Խմբագրել է Փրանսերէն Gazette Medicale d'Orient բժշկական պարբերաթերթը: 1861ին նշանակուել է Լեոնայիրանանի ընդհանուր կառավարիչ Արթին փաշա Տաւուտեանի բժշկական տեսուչ եւ խորհրդական: 1865ին վերադառնալով Կ.Պոլիս՝ կարգուել է Ս. Յակոբ հիւանդանոց-անկելանոցի բժշկապետ: Ունեցել է միւրաշախի գինուորական աստիճան եւ բէյի տիտղոս⁷⁴:

Գասպար բէյ Սինապեան (1814-1872)

Գասպար բէյ Սինապեանը արքունի դեղապետ Գէորգ Սինապեանի որդին է: Մասնագիտական կրթութիւն է ստացել Պիզայի եւ Փարիզի Բժշկական Համալսարաններում: 1845ին Կ.Պոլիս վերադառնալուց անմիջապէս յետոյ սկսել է դասաւանդել Կ.Պոլիսի ԿԶԲՎում: ԿԲԸի հիմնադիրներից է, որի նախագահն է եղել 1863ին⁷⁵: Որպէս Առողջապահական Բարձրագոյն Խորհրդի անդամ՝ մեծ մասնակցութիւն է ունեցել 1865ի հնդախտի համաճարակի վերացման գործին: Հակառակ իր կամքին եւ կոչմանը՝ նշանակուել է Պետական Բարձրագոյն Խորհրդի վճռաբեկ Ատեանի անդամ: Եղել է վարչապետ Ալի փաշայի անձնական բժիշկը եւ ծառայել վալիսէ Սուլթանուհու (մայր սուլթանուհի) մօտ: Ունեցել է գնդապետի գինուորական աստիճան: Սինապեանը նշանաւոր է եղել հայ կաթողիկ հասարակութեանը մատուցած ծառայութիւններով: Հեղինակ է բժշկութեանը նուիրուած ուսումնասիրութիւնների⁷⁶:

Մկրտիչ բէյ Բառլատեան (1822-1873)

Գերագանց արդիւնքներով աւարտել է Կ.Պոլիսի ԿԶԲՎն: Կ.Պոլիսի եւ կայսրութեան տարբեր վայրերի գինուորական հիւանդանոցներում ու գորամասերում ծառայել է որպէս գինուորական բժիշկ: 1863ին ստացել է միւրաշախի աստիճան եւ ուղարկուել Բաղդադ՝ որպէս տեղի կայսերա-

կան բանակի եւ գինուորական հիւանդանոցի բժշկապետ եւ շուրջ 10 տարի մնացել այդ ծառայութեան մէջ⁷⁷ :

Ֆերուխան Բարունակ րէյ Բրթիկեան (Քոթիկեան, 1824-1869)

1847ին Կ.Պոլսի ԿԶԲՎ ն աւարտելուց անմիջապէս յետոյ ծառայութեան մէջ է մտնում Հայդարփաշայի եւ Մանասթրրի գինուորական հիւանդանոցներում: 1853-1859 Մանասթրրի Զինուորական Հիւանդանոցում վարում է բժշկապետի պաշտօնը: Իր մասնագիտական հմտութեան շնորհիւ մեծ համբաւ եւ հեղինակութիւն է ձեռք բերել: 1855ին Օսմանեան կառավարութիւնը Ֆերուխանի անձնուէր ծառայութիւնները գնահատելով՝ նրան շնորհել է միրալախի աստիճան եւ այնուհետեւ տեղափոխել Շումնայում տեղակայուած կայսերական զօրաբանակ եւ նշանակել նրան բժշկապետի պաշտօնում: Անդամակցել է ԿԲԸին եւ Արքունի Բժշկական Ժողովին: 1865ի հնդախտի համաճարակի վերացման համար ստեղծուած յանձնաժողովի աշխատանքներին իր գործուն մասնակցութեան եւ անբասիր ծառայութիւնների համար գնահատուել է սուլթանի կողմից՝ արժանանալով Մեջիդիէի Գ. կարգի պատուանշանի⁷⁸ :

Բարունակ րէյ Բրթիկեանը հաւասար եռանդով կատարել է ազգային եւ պետական պարտականութիւնները: 1867ին եղել է Սուրբ Փրկիչ Ազգային Հիւանդանոցի լիազօր վերատեսուչը եւ մասնակցել այնտեղ տեղ գտած թերութիւնների վերացման աշխատանքներին: Մասնակցել է նաեւ Սահմանադրական Յանձնաժողովի աշխատանքներին: Անդամակցել է Ուսումնական Խորհրդին եւ վարել Քաղաքական Ժողովի ատենապետի պաշտօնը: Որպէս հրապարակագիր՝ Բարունակ րէյ Բրթիկեանը հանդէս է եկել Մասիա եւ Հայաստան պարբերականներում: Հեղինակ է Ծանապարհորդութիւն ի Բարելոն ընդ Հայաստան ուղեգրական գործի⁷⁹ :

Յակոբ րէյ Յովհաննէսեան (1826-1859)

Նա Կ.Պոլսոյ ԿԶԲՎի առաջին շրջաւարտներից է: Սուլթանական բարձր հրամանով կարգուել է ԿԶԲՎի դասախօս: Վարել է նաեւ Շումնայում տեղակայուած կայսերական բանակի բժշկապետի պաշտօնը: Հասել է միրալախի աստիճանի եւ ստացել բէխ տիտղոս: Պաշտօնավարել է նաեւ Սուրբ Փրկիչ Ազգային հիւանդանոցում՝ որպէս բժշկապետ⁸⁰ :

Յովհաննէս րէյ Շիմշիրեան (՝-1895)

Կ.Պոլսոյ ԿԶԲՎի շրջանաւարտներից է: Որպէս գինուորական բժիշկ ծառայել է Չաթայլճայում տեղակայուած գնդում, Եմէնի ռազմաճակատային գծում: Մասնակցել է 1877-1878ի ռուս-թուրքական պատերազ-

մին եւ վիրաւորուել: Օսմանեան բանակին մատուցած ծառայութեան համար հասել է միրալաթի աստիճանի եւ արժանացել բէթի տիտղոսի⁸¹:
Յակոբ բէյ Սանտանեան (1834-1898)

Հարիւրապետի աստիճանով 1860ին աւարտում է ԿԶԲՎՆ: Պաշտօնավարել է Կ.Պոլսի մի շարք գինուորական հիւանդանոցներում: Զինուորական եւ քաղաքային վարժարաններում դասաւանդել է դատական բժշկութիւն: Պատրաստել է դատական բժշկութեանը նուիրուած դասագրքեր, որոնցով երկար շրջան ուսանում էին բժշկական վարժարանների թուրք ուսանողները: Եղել է Առողջապահական Բարձրագոյն Խորհրդի ընդհանուր քարտուղարը⁸²: Ըստ թուրք պատմարան Ռըզա Թահսինի՝ Յակոբ բէյ Սանտանեանը կարող եւ բժշկութեան ասպարէզում կատարեալ հմտութիւն ցուցաբերած պատուական անձնաւորութիւն էր: Ունէր միրալաթի գինուորական աստիճան եւ բէթի տիտղոս⁸³:
Կոմիտաս բէյ Մինասեան (1837-1903)

Մասնագիտական կրթութիւնը ստացել է Կ.Պոլսի ԿԶԲՎՆում: 1859ից որպէս գինուորական բժիշկ ծառայել է կայսրութեան տարբեր վայրերում տեղակայուած գորամասերում: Իր խղճամիտ եւ անբասիր ծառայութեան համար մեծ հեղինակութիւն եւ փառք է վայելել ու հասել գնդապետութեան աստիճանի: Օրէնսգէտ բժշկի պաշտօնով 1871-1875 ծառայել է Օսմանեան կայսրութեան Ոստիկանութեան նախարարութիւնում: Անյայտ պատճառներով հեռացել է պաշտօնից: 1878ին հրաւիրուել է Ռազմական նախարարութիւն, ուր եւ պաշտօնավարել է մինչեւ իր մահը⁸⁴: Մամուլում հանդէս է եկել Ֆրանսերէն բանաստեղծութիւններով:

Յովհաննէս բէյ Թապիպեան (1845-1894)

Փայլուն արդիւնքներով աւարտել է ԿԶԲՎՆ եւ մրցոյթում յաղթելով՝ կառավարութեան կողմից ուղարկուել Վիեննա՝ մասնագիտական ուսման մէջ խորանալու: Վերադարձին սկսել է դասախօսել ԿԶԲՎՆում: Իր մասնագիտական հմտութիւնը նախանձ է յարուցել այդ ճիւղի մէկ այլ թուրք դասախօսի մօտ: Դա պատճառ է հանդիսացել, որ նրան հեռացնեն վարժարանից եւ ուղարկեն գինուորական ծառայութեան Շքոտրա քաղաքը (Ալբանիա), ուր Թապիպեանը տաս տարի (1875-1885) ծառայել է որպէս տեղի հիւանդանոցի բժշկապետ: ԿԶԲ Վարժարանը զգալով ախտային անդամազննութեան մասնագէտի խիստ պակասը՝ Յովհաննէս Թապիպեանին կրկին հրաւիրում է աշխատանքի: Դասաւանդել է նաեւ Քաղաքային Բժշկական Վարժարանում⁸⁵: Ունեցել է մ/

րալաթի գինուորական աստիճան: Փաշայութիւն ստանալու նախօրեակին յանկարծամահ է լինում⁸⁶:

Տիգրան բէյ Աճէմեան (1852-1913)

1874ին հարիւրապետի աստիճանով աւարտել է Կ.Պոլսի ԿԶԲՎն եւ շատ չանցած կառավարութեան կողմից ուղարկուել Վիեննա՝ մասնագիտական կրթութեան մէջ խորանալու: 1877ին վերադառնում է Կ.Պոլիս եւ պաշտօնավարում տարրեր հիւանդանոցներում: Այնուհետեւ դասախօսական պաշտօնի անցնում ԿԶԲՎում: Վարել է ԿԲԸի փոխատենապետի պաշտօնը: Իր ժամանակի ամենաճարտար եւ համրաւաւոր ակնարոյժն էր: Ծուրջ 30 տարի դասախօսել է ԿԶԲՎում՝ թուրքական բժշկութեան համար պատրաստելով բազմաթիւ մասնագէտներ: Այս բազմամեայ մանկավարժական գործունէութիւնն ըստ արժանւոյն չի գնահատուել: Փաշայի տխրոսին արժանանալու փոխարէն՝ նրան զրկել են իր պաշտօնից, որից վշտահար Աճէմեանը վախճանուել է միրալաթի աստիճանում: Թողել է ակնարուժութեանը նուիրուած հրատարակութիւններ: Վարել է Ազգային Երեսփոխանական Ժողովի եւ Ուսումնական Խորհրդի ատենապետի պաշտօնները⁸⁷:

Յակոբ բէյ Տատրեան (1853-1936)

1880ին աւարտել է ԿԶԲՎն: Տաս տարի գինուորական ծառայութեան մէջ է գտնուել Բաղդադի, Մուսուլի, Բասրայի գինուորական հիւանդանոցներում: Պաշտօնավարել է նաեւ Թրակիայի՝ Քրքլարելիի եւ Զորլուի գինուորական հիւանդանոցներում: Եղել է Մարմարա-էրէյլիի գինուորական հիւանդանոցի բժշկապետը: Մասնակցել է Բալկանեան պատերազմին: Ա. Աշխարհամարտի առաջին երկու տարիներին վարել է Սելիմիէ հիւանդանոց-գորանոցի բժշկապետի պաշտօնը: Ունէր միրալաթի կոչում: Փորձառու եւ հեղինակաւոր բժիշկի համրաւ է ունեցել: Արքունիքի եւ ընդհանուր սպայակոյտի կողմից պատուրուած է շքանշաններով⁸⁸:

Սարգիս բէյ Պէրպէրեան (1857-1945)

Աւարտել է ԿԶԲՎն: Եղել է Թոփգափուի Զինուորական Հիւանդանոցի բժշկապետը: Բալկանեան պատերազմի եւ Ա. Աշխարհամարտի ժամանակ որպէս գինուորական բժիշկ ծառայել է ճակատային տարրեր գինուորական հիւանդանոցներում: Երկար ժամանակ ծառայել է Սիրիայի, մասնաւորապէս Եմէնի ռազմաճակատային գծում⁸⁹:

Արթին բէյ Տելլէթեան (1852-1937)

1884ին աւարտել է Կ.Պոլսի ԿԶԲՎն: Մեծ ծառայութիւններ է մատուցել թուրքական բանակին: 23 տարի եղել է էզիրնէի գինուորական

Հիւանդանոցի բժշկապետը, իսկ 1910ից վիրաբուժապետը՝ Հայդարփաշայի գինուորական Հիւանդանոցի: Բալկանեան պատերազմի ժամանակ ծառայել է Բ. զօրաբանակում որպէս բժշկապետ, իսկ Ա. Աշխարհամարտի տարիներին եղել է Փատրզիւղի գինուորական Հիւանդանոցի բժշկապետը: Ունեցել է գնդապետի աստիճան: Իրեն առաջարկուել է է-դիրնէ նահանգի շրջայի փաշայութիւնը (զօրապետութիւնը), սակայն տարիքի պատճառով հրաժարուել է:⁹¹

Գրիգոր բէյ Թագուորեան (?-1884)

Մասնագիտական կրթութիւն ստացել է Կ.Պոլսի ԿԶԲՎում եւ Փարիզի Բժշկական Համալսարանում: Ծառայել է երկրի տարբեր վայրերում տեղակայուած օսմանեան բանակի զօրամիւսւորումներում եւ գինուորական Հիւանդանոցներում: Հասել է միրալաթի աստիճանի եւ արժանացել բէյի տիտղոսի:⁹²

Արթին բէյ Հալվաճեան (1865-1915)

Սովորել է ԿԶԲՎում: Երկար տարիներ ծառայել է Թուրքական բանակում եւ գինուորական Հիւանդանոցներում: Իր խղճամիտ ծառայութեան համար գնահատուել է Ռազմական նախարարութեան կողմից եւ արժանացել միրալաթի կոչմանն ու բէյի տիտղոսին: Ա. Աշխարհամարտի ժամանակ որպէս Ե. զօրագնդի բժշկապետ՝ ուղարկուել է Կովկասեան ռազմաճակատ: Այս ճակատում Թուրքական բանակի կրած պարտութիւնից յետոյ, կասկածելի համարելով ռուսական սահմանազլխում հայ գինուորական բժիշկների ներկայութիւնը՝ ուղարկուել է Խարբերդ-Մեզիրէ, ուր պարտաճանաչ եւ իր գործին գիտակից հմուտ բժիշկը մեծապէս օգտակար է եղել Թուրքական բանակին, մասնաւորապէս բժաւոր տենդի համաճարակի օրերին՝ հազարաւոր Թուրք գինուորների կեանքեր փրկելով: Արժանացել է տեղի գինուորական իշխանութիւնների գնահատանքին: Սակայն Արթին բէյ Հալվաճեանը կիսելով իր հայրենակիցների ճակատագիրը՝ նահատակուել է 1915ին⁹³:

Յակոբ բէյ Պէկեան (?-1928)

1869ին աւարտել է ԿԶԲՎն: Աւելի քան կէս դար եղել է գինուորական ծառայութեան մէջ: Հասել է միրալաթի գինուորական աստիճանի: 1891-1894 անդամակցել է Մ. Փրկիչ Ազգային Հիւանդանոցի հոգաբարձութեանը: Անդամակցել է նաեւ Բերայի Թաղական Խորհրդին⁹⁴:

Մինաս բէյ Աւետիսեան (1849-?)

Ուսանել է Իտալիէ Զինուորական Վարժարանի Անասնարուժութեան Բաժնում: Երեսուէն տարի շարունակ դասաւանդել է Զինուորական Անասնարուժական Վարժարանում: Երկրին եւ օսմանեան բանա-

կին մատուցած ծառայութիւնների համար հասել է միրալախ աստիճանի: 1903ին Համիդ Բ-ի դէմ անյաջող մահափորձի օրը Մինաս բէյը ի պաշտօնէ ընկերակցում էր հեծեալ գնդին: Իր հայ լինելու պարագան պատճառ է դառնում նրա ձերբակալութեան եւ աքսորին: 1910ին Դամասկոսից վերադառնում է եւ ստանձնում իր նախկին պաշտօնները: Անասնարուժական Վարժարանի ուսանողների համար պատրաստել է անասնարուժութեանը նուիրուած ձեռնարկներ, որոնցով երկար շրջան ուսանել են թուրք ուսանողները⁹⁶:

ԶԻՆՈՒՈՐԱԿԱՆ ԿՈՉՈՒՄ ՈՒՆԵՑՈՂ ՀԱՅ ՊԱՇՏՏՕՆԵԱՆԵՐ

ԺԹ. դարի կէսերից հայերի առջեւ պետական գործունէութեան լայն ասպարէզ բացուեց, երբ կայսրութիւնը փորձեց սերտացնել իր յարաբերութիւնները Եւրոպայի հետ եւ Բարձրագոյն Դուռը, հետեւելով եւրոպական երկրներին, սկսեց արդիականացնել իր վարչական համակարգը: Ի թիւս միւս գերատեսչութիւնների՝ հայերը պատասխանատու պաշտօններ զբաղեցրին նաեւ Նաւատորմի եւ Ռազմական նախարարութիւններում: Նրանցից ոմանք իրենց գործունէութեան ընթացքում արժանացել են զինուորական բարձր կոչումների:

Յովսէփ Վարդանեան (Վարդան փաշա) (1815-1879)

Երիտասարդ տարիքում պետական ծառայութեան մէջ է մտնում օսմանեան Նաւատորմի նախարարութիւնում: Ստացել է միրամիրանի զինուորական աստիճան եւ փաշայի տիտղոս: Ղրիմի պատերազմի (1853-1856) ժամանակ վարել է օսմանեան նաւատորմի Ա. թարգմանի պաշտօնը: 25 տարի զինուորական ծառայութեան մէջ մնալուց յետոյ անցել է քաղաքացիական պաշտօնների⁹⁶: Օսմանեան տարբեր նախարարութիւններում վարել է պատասխանատու պաշտօններ եւ իր օգտաշատ գործունէութեան համար արժանացել բէյի տիտղոսի: Նրա կուրծքը զարդարում էին Օսմանիէի եւ Մեջիդիէի տարբեր կարգի եւ Եւրոպական մեծ տէրութիւնների կառավարութիւնների կողմից շնորհուած շքանշանները⁹⁷:

Յովսէփ Վարդանեանը ժամանակի ամենազարգացած, լեզուների գիտակ, եւրոպական գրականութեանն ու մշակոյթին քաջատեղեակ այն անձնաւորութիւնն էր, որ աւելի քան 25 տարի փայլել է հայ հանրային կեանքում որպէս հրապարակախօս եւ խմբագիր: Հիմնականում հայատառ թուրքերէն լեզուով հրատարակել է գեղարուեստական եւ պատմագիտական արժէքաւոր երկեր⁹⁸:

Անտոն Եաւէր փաշա Թընկերեան (1812-1908)

Ինքնակրթութեամբ տիրապետել է ֆրանսերէն, իտալերէն, յունարէն, թուրքերէն լեզուներին: 24 տարեկանում մտել է պետական ծառայութեան մէջ՝ աշխատելով Բարձրագոյն Դրան Թարգմանչաց Դիւանում, այնուհետեւ՝ Շոգենաւերի Վարչութիւնում: Ղրիմի պատերազմի ժամանակ օսմանեան ընդհանուր զօրքերի հրամանատար էօմէր փաշայի քարտուղարն էր: 1855ին ստանում է ռազմա-ծովային նաւատորմի միրալայի աստիճան: 1855-1856 Թընկերեանին է յանձնուում Շոգենաւերի Ընդհանուր Վարչութիւնը եւ Արքունի Նաւարանի Վերատեսչութիւնը: 1862ին արժանանում է միրալայի գինուորական կոչմանը: 1864ին ըստանձնում է Ռազմական նախարարութեան Օտար Լեզուների Թղթակցութեան Դիւանի Տնօրէնի պաշտօնը: 1870-1871 անդամակցում է Պետական Խորհրդին: 1875-1876 հասել է Ռումելիի պէյլէրպէյի աստիճանի: Վարել է նաեւ օսմանեան Նամակատարութեան եւ Հեռագրական Նախարարի պաշտօնը եւ կարեւոր բարեկարգութիւններ մտցրել այս ապարէզում: 1881ին դարձել է քննիչ Հանրային Պարտուց Վարչութեան, իսկ 1903ին՝ Ելեւմտական Բարձրագոյն Խորհրդի անդամ⁹⁹: Անտոն փաշա Թընկերեանը 58 տարի ծառայել է Օսմանեան տէրութեանը: Օսմանեան կայսրութեան եւ օտար երկրների կառավարութիւնների կողմից արժանացել է Մեջրիթի եւ Օսմանիթի տարբեր կարգի, Պատուոյ Լեզէոնի, Ս. Մաւրիկիոսի, Ս. Ղազարի եւ այլ շքանշանների¹⁰⁰:

Թորոս բէյ Գիսակը նոյնպէս օսմանեան նաւատորմի պաշտօնեայ էր եւ ունէր միրալայի աստիճան¹⁰¹:

Լեռնայիրանանի հայազգի կառավարիչներ կարապետ Արթին փաշա Տաւուտեանը, Յովհաննէս փաշա Գուլումճեանը ունեցել են միւշրի (մարաջախտ) կոչում: Մինչ Լեռնայիրանանի կառավարչի պաշտօնի ստանձնումը, նրանք վարել են դիւանագիտական պաշտօններ եւ չեն ունեցել գինուորական կոչումներ: Թերեւս կարեւոր պայման էր, որ Լեռնայիրանանի կառավարիչներն ունենան գինուորական աստիճան, մանաւանդ, որ այս տարածաշրջանը գտնուել է համայնքային գինուած բախումների մէջ:

Կարապետ փաշա Տաւուտեան (1816-1873)

Երկար ժամանակ դեսպանական պաշտօններ է վարել Եւրոպայի երկրներում եւ դիւանագիտական շրջանակներում մեծ հեղինակութիւն վայելել: Եւրոպայի հինգ մեծ տէրութիւնների եւ կայսրութեան կողմից կազմուած յանձնաժողովը 1861ին Տաւուտեանին նշանակում է ինքնավար Լեռնայիրանանի ընդհանուր կառավարիչ: Նրան շնորհուում է միւ-

շիրի կոչում եւ փաշայի տիտղոս: Կայսրութեան մէջ նա առաջին քրիստոնեան էր, որը արժանացել է մարաջախտի բարձր կոչմանը:

Իր պաշտօնավարութեան շրջանում Տաւուտեանը վարել է Լեռնայիրանանի ինքնուրոյնութիւնը պահպանելու, կրօնական հակամարտութիւնները մեղմացնելու, առեւտրական, տնտեսական եւ կրթամշակութային վերելքը խթանելու քաղաքականութիւն: Յետագայում նրան փստահւում է կայսրութեան Հասարակական Կառոյցների Նախարարի պաշտօնը: Ի թիւս միւս օգտաշատ ձեռնարկների՝ նա կարողացել է կազմակերպել Ասիան եւ Մերձաւոր Արեւելքը Եւրոպային կապող Ռուսեյի երկաթուղու շինարարութիւնը, որը կայսրութեան տնտեսական եւ քաղաքական կեանքում բացառիկ նշանակութիւն է ունեցել¹⁰²:

Տաւուտեանը բազմակողմանի զարգացման տէր անձնաւորութիւն էր: Հին գերման ցեղերի օրէնքներին նուիրուած իր գիտական ծաւալուն ուսումնասիրութեան համար Գերմանիայի կանցլէրի կողմից նա ստացել է յատուկ մրցանակ եւ ընտրուել Բեռլինի Գիտութիւնների Ակադեմիայի անդամ¹⁰³:

Որպէս պետական բարձր պաշտօնեայ եւ արժէքաւոր քաղաքագէտ նա արժանացել է շքանշանների- 1867ին Նապոլէոն Գ.ն նրան շնորհել է Պատուոյ Լեգէոնի պատուանշանը: Օսմանեան կառավարութիւնից ստացել է տարբեր կարգի շքանշաններ, Օսմանիէի մեծ ժապաւէնը, իսկ Հռոմի Պապը նրան շնորհել է Մեծն Գրգորի Ասպետութեան առաջին կարգի շքանշանը¹⁰⁴:

Յովհաննէս փաշա Գույումճեան (1858-1933)

Սովորել է Կ.Պոլսի Վիեննական Մխիթարեանների Վարժարանում եւ Փարիզի Յիսուսեանների հռչակաւոր Vaugirard կրթական հաստատութիւնում: Կ.Պոլսի վերադառնալով՝ մտել է պետական ծառայութեան: Պատասխանատու պաշտօններ է վարել է Արտաքին Գործոց նախարարութիւնում: 1899-1908 եղել է Հռոմում օսմանեան դեսպանատան Աքարտուղարը, այնուհետեւ՝ Իտալիայում օսմանեան գործերի հաւատարմատարը: 1908ին վերադարձել է Կ.Պոլսի եւ ընտրուել Պետական Խորհրդի անդամ եւ նոյն թուականից վարել Արտաքին Գործոց փոխնախարարի պաշտօնը: 1912ին Գաբրիէլ Նորատունկեանը նշանակուում է կայսրութեան Արտաքին Գործոց Նախարար: Տեսնելով, որ Արտաքին Գործոց Նախարարութիւնում հայերի բարձր դիրքը կարող է թուրքերի նախանձր գրգռել՝ այս երկու բարեկամները ցուցաբերում են փոխըմբռնում: Գույումճեանը հրաժարուում է Արտաքին Գործոց նախարարութիւնում զբաղեցրած իր պաշտօնից եւ ընդունում Լեռնայրանանի կա-

աւարչի պաշտօնը, որը ժամանակ առաջ մերժել էր: Նրա թեկնածու-
թիւնը միաձայն ընդունուել է Եւրոպական մեծ տէրութիւնների կող-
մից¹⁰⁶: Գույումճեանին շնորհում է միւշիթի կոչում եւ փաշայի տիտ-
ղոս: Այս պաշտօնը նա ստանձնել է քաղաքական խառնակ վիճակում: Ե-
րեք տարուայ պաշտօնավարութեան շրջանում իրականացրել է հինգ
կարեւոր բարեկարգութիւններ՝ այսպիսով օգտակար լինելով Լեւնայի-
բանանի ժողովրդին: 1915ին Բարձրագոյն Դուռը չեղեալ է յայտարա-
րում Լեւնայիբանանի առանձնաշնորհեալ կարգավիճակը եւ Գույում-
ճեանը վերադառնում է Կ.Պոլիս, ընտրւում օսմանեան Մերակոյտի ան-
դամ, սակայն հրաժարուել է այս պաշտօնից՝ չցանկանալով առնչութիւն
ունենալ այդ արիւնոտ կառավարութեան հետ, եւ մեկնել Հոռոմ¹⁰⁶:

Օսմանեան բանակում ծառայած հայերից միւշիթի զինուորական
կոչում է ունեցել նաեւ օսմանեան ողջ բանակի գլխաւոր դեղագործ
Ֆերդի փաշա Թերճիմանեանը¹⁰⁷:

ՀԱՅՆՐԻ ԶԻՆՈՒՈՐԱԳՐՈՒԹԵԱՆ ՀԱՐՑԸ

Հայ-թուրք համակեցութեան պատմութեան ընթացքում եղել են բա-
ցառիկ, եզակի դէպքեր, երբ օսմանեան իշխանութիւնները դիմել են
հայերի ռազմական օգնութեանը: Զալայիների ապստամբութեան ժա-
մանակ, երբ Դելի Հասանը 1600ին յարձակուել էր Մերաստիայի վրայ,
տեղի կառավարիչ փաշան, չունենալով բաւական չափով կանոնաւոր
զօրք, զինում է քաղաքի բնակիչներին, այդ թւում նաեւ հայերին: Քա-
ղաքացիք կուռում են, սակայն պարտուելով՝ ենթարկւում են Զալայիների
վրէժխնդրութեանը¹⁰⁸:

1787ին, երբ պատերազմ ծագեց Օսմանեան կայսրութեան եւ Աւստրի-
այի ու նրա գինակից Ռուսաստանի միջեւ՝ օսմանեան բանակը զօրաց-
նելու նպատակով մեծ եպարքոս Եուսուֆ փաշան աննախընթաց որո-
շում է կայացնում քրիստոնեաներին զինուորագրել: Օրուայ պատրի-
արք Զաքարիա Կաղզուանցին ստիպուած էր համաձայնուել եւ չորս
տարի տեւած պատերազմի ընթացքում իւրաքանչիւր տարի բանակին
տրամադրել պահանջուած լաւ պատերազմող 1000ական զինուոր¹⁰⁹:

1839ի Նոյեմբերի 9ին սուլթան Արդուլ Մեջիդը (1839-1861) Գիւլհա-
նէի արքայական պալատում հռչակեց օսմանեան բարենորոգումների
առաջին հրովարտակը՝ Գիւլհանէի Հաթիթ-ը Շերիֆը (վարդաստանի
հրովարտակը), որը ծանօթ է Թանգիմաթ անունով: Այն կայսրութեան
բոլոր հպատակներին, առանց կրօնի եւ ցեղի խտրականութեան, խոս-
տանում էր հաւասարութիւն, կեանքի եւ գոյքի ապահովութիւն, տուր-

քերի եւ հարկերի արդար բաշխում եւ կանոնաւոր գինուորագրութիւն¹¹⁰ : Դա նշանակում էր, որ քրիստոնեաները կարող էին անարգել մուտք գործել օսմանեան բանակի շարքերը : Սակայն Բարձրագոյն Դուռը հրաժարուեց քրիստոնեաների գինուորագրութեան զաղափարից եւ շարունակեց գանձել գինուորական տուրքը նախ՝ *Իյանէ-ի ասքերիէ* (օժանդակութիւն բանակին) եւ ապա՝ *բեղէլ-ի ասքերիէ* (գինուորագրութեան փոխարէն) անուաններով¹¹¹ :

1847ին հայերը գինուորական ծառայութեան կանչուեցին կառավարութեան կողմից, երբ օսմանեան բանակը երկրի արեւելեան նահանգներում պայքարում էր քուրդ ինքնիշխան ցեղապետերի դէմ¹¹² : Հայերի մասնակցութիւնը քրդերի դէմ մղուած կռիւներում բխում էր դարերով կուտակուած գայրոյթից, քանզի հայ գիւղացիների կեանքի, ունեցուածքի եւ պատուի ապահովութիւնը կախուած էր քուրդ ցեղապետերի քմահաճոյքից¹¹³ :

1864ին բացուեց Հարրիէի Զինուորական Վարժարանը, որը նախատեսուած էր նաեւ ոչ-մահմեդականների համար : Սուլթան Արղուլ Ազիզի (1861-1876) հրամանով հինգ հայ երիտասարդներ ընդունուեցին վարժարան : Սակայն նրանց թոյլ չտրուեց հարիւրապետի աստիճանից բարձրանալ : Մինչեւ 1908 Հարրիէի գինուորական այս վարժարանի դռները փակ մնացին հայերի համար¹¹⁴ :

1877ի ռուս-թուրքական պատերազմում մեծ կորուստներ կրելով՝ Օսմանեան կառավարութիւնը հարկաւոր համարեց զօրք հաւաքագրել նաեւ իր հպատակ քրիստոնեայ ազգերից եւ դիմեց նրանց ներկայացուցիչ պատրիարքներին¹¹⁵ : Կ.Պոլսի Ազգային Երեսփոխանական Ժողովի 1877ի Դեկտեմբերի 14ի նիստի մասնակիցների ստուար մեծամասնութիւնը մերժեց դոհացում տալ կառավարութեան պահանջին, թէեւ եղան նաեւ այդ որոշման ընդդիմադիրներ : Կառավարութեան գինուորագրութեան առաջարկի հանդէպ Կ.Պոլսի Ազգային Երեսփոխանական Ժողովի այս յանդուգն դիրքը գայրոյթ յառաջացրեց օսմանեան կառավարող շրջանակներում : Ազգային Ժողովի պատմական այս նիստում արտայայտուած տրամադրութիւնները խանդավառութեան այլք ստեղծեցին բակում հաւաքուած ժողովրդի մօտ¹¹⁶ :

1878ից հինգ տարի առաջ Ազգային Երեսփոխանական Ժողովում գաւառներում հարստահարութիւնների հարցը քննարկելիս՝ կազմուած յանձնաժողովի անդամների մեծամասնութիւնը գտաւ, որ *բեղէլ-ի ասքերիէ* հարկի պատճառով ժողովուրդը շատ է հարստահարում ուստի դրա փոխարէն արժէ որ գինուոր տրուի օսմանեան բանակին : Այդ օրե-

րի պատրիարք Մկրտիչ Խրիմեանը մերժեց այդ գաղափարը՝ հարցը թողնելով ապագային, երբ ապահովուի քրիստոնեաների եւ մահմեդականների հաւասարութիւնը բանակում¹¹⁷։

Օսմանեան իշխանութիւնները քաջ գիտակցում էին, որ բանակում չէր կարող լինել հաւասարութիւն։ Դեռ սուլթան Մահմուդ Բ-ն (1808-1839) երկրի մահմեդականների վրայ ծանրացած զինուորական ծառայութեան պարտականութեան բեռը թեթեւացնելու նպատակով մտադրում է կայսրութեան հպատակ բոլոր ազգերի համար պարտադիր զինուորագրութեան օրէնք սահմանել։ Այդ, եւ մասնաւորապէս, հայերի զինուորագրութեան խնդրի շուրջ 1839ի Ապրիլի 5ին Մալաթիայից Գերմանիա՝ իր բարեկամին ուղղուած նամակում Մահմուդ Բ-ն յայտնում է այն տեսակէտը, որ Անատոլիայի հայերը կարգապահութեան սովոր, շափաւոր, ուժեղ եւ կորովի ազգ են եւ արարներից ու մահմեդական քրդերից առաւել պիտանի են Օսմանեան պետութեանը, սակայն հայերը կը ճգմուեն մահմեդականներից կազմուած զօրամիւտորումներում, կը չքանայ նրանց եռանդը եւ յռաջխաղացման ամէն ցանկութիւն, ուստի արդիւնաւէտ կարող էր լինել զուտ հայերից կազմուած առանձին ջոկատների եւ վաշտերի ստեղծումը, սակայն մահմեդական մոլեռանդութիւնը խոչընդոտ կը լինի նման զօրամիւտորումների գոյութեանը¹¹⁸։

1908ի օսմանեան սահմանադրութեան վերահռչակումից յետոյ, հայերը եւ երկրի միւս քրիստոնեաները օսմանեան խոհրդարանում պահանջեցին զինուորագրուել եւ հաւասար իրաւունքներով ծառայել օսմանեան բանակում։ Հայերի պահպանողական տարրը դէմ էր զինուորագրութեանը, իսկ երիտասարդութիւնը՝ կողմնակից։ 1910ի օսմանեան խորհրդարանի ընդունած օրէնքից յետոյ երկրի բաղկացուցիչ բոլոր ազգերը ենթակայ էին զինուորական ծառայութեան։ Զինուորագրութեան օրէնքի ընդունուելուց յետոյ վերացաւ *բեդէլ-ի ասքերիէն*։ 1910ի Օգոստոսին եւ Սեպտեմբերին հրատարակուած զօրակոչի հրամանը խանդավառութեամբ ընդունեցին հայ երիտասարդները, որովհետեւ ստորացուցիչ *հպատակ, բայա, գերի բառերի* ծանր բեռը վերցուեց նրանց ուսերից¹¹⁹։

Զինուորական ասպարէզը բացուեց հայերի համար։ Օգտուելով ընձեռուած հնարաւորութիւնից՝ հայ երիտասարդները սկսեցին ուսանել Հարրիէի Վարժարանում եւ շատ շուտով ցուցաբերեցին իրենց կարողութիւնները զինուորական ասպարէզում։ Թուրք սպաները հայերի կարգապահութիւնը, հաւատարմութիւնը, մաքրասիրութիւնը գնահատելով՝ սկսեցին թուրք զինուորներին փոխարինել հայերով։ Շատերը

շուտով զինուորական աստիճանի բարձրացում ունեցան: Թէ՛ Բալկանեան պատերազմի եւ թէ՛ Ա. Աշխարհամարտի ժամանակ հայ զինուորականները կատարեցին բազում քաջագործութիւններ եւ թուրք բարձր զինուորականութեան կողմից գովեստի արժանացան՝ փաստելով, որ հայր ոչ միայն ճարտար առեւտրական եւ արհեստաւոր է, այլեւ քաջ զինուոր¹²⁰:

Բալկանեան պատերազմի ժամանակ, Եանիայի համար մղուող մարտերում հայ զինուորները գլխաւորապէս թնդանօթաձիգներ էին: Թուրք հրամանատարները գովեստով էին խօսում նրանց լաւ նշանառու լինելու եւ ցուցաբերած տոկունութեան ու քաջութեան մասին¹²¹:

1914ի Օգոստոսի 1ին սկսուեց Ա. Աշխարհամարտը: Որպէս Գերմանիայի դաշնակից՝ Օսմանեան պետութիւնը Հոկտեմբերին յայտարարութեց պատերազմին իր մասնակցութեան մասին: Օսմանեան բանակ զօրակոչուեցին 18-45 տարեկան ռազմունակ շուրջ 100 հազար հայ տղամարդիկ¹²²: Նրանք միացան մինչ այդ օսմանեան բանակում ծառայութեան մէջ գտնուող հայ զինուորականութեանը:

Չնայած բանակում հայ զինուորների համար ստեղծուած ծանրագոյն պայմաններին՝ նրանք փութացել են կատարել իրենց զինուորական պարտականութիւնները եւ այնպէս անձնուիրաբար, որ կովկասեան ռազմաճակատում թուրքական զօրքի յարձակման Կարին-Սարիղամիշ ուղղութեան ճակատում գերի ընկնելու վտանգից ազատել են էնվէրին: Դրանից յետոյ նա հայ զինուորներների մասին գովեստի եւ շնորհակալութեան խօսք է ուղարկել Կ.Պոլսոյ Հայոց Պատրիարք Զաւէն Տէր-Եղիայեանին¹²³:

Միւս կողմից, սակայն, պատերազմի առաջին օրերից երկրում սկսուեց հայ զինուորների դասալքութեան մասին կեղծ քարոզչութիւնը: Դա միայն պատրուակ էր հայ ժողովրդի բնաջնջման երիտթուրքական կառավարութեան կանխամտածուած ծրագիրն իրականացնելու համար¹²⁴:

1915ի Փետրուարի 12ին սկսուեց օսմանեան բանակի հայ զինուորականութեան զինաթափումը, որից յետոյ նրանցից կազմուեցին *ամելէթարուրիները* (բանուորական վաշտեր): Նոյն ժամանակ սկսուեցին հայ սպաների մեկուսացումն ու ձերբակալութիւնները¹²⁵: Դրան հետեւեց ռազմական նախարար էնվէրի օսմանեան բանակում ծառայող հայ զինուորների ոչնչացման մասին հրամանը¹²⁶: Հայ զինուորականութիւնը թիկունքում խուճր-խուճր սպանուեց անօրինակ դաժանութեամբ:

Ա. Աշխարհամարտի առաջին օրերից զինուորական հիւանդանոցներում ծառայող հայ զինուորական բժիշկներից շատերը ընկան պատե-

րագմի դաշտում: Ոմանք մահացան իրենց պարտականութիւնները կատարելու ժամանակ՝ բժաւոր տենդով վարակուած թուրք զինուորներին խնամելիս: Իսկ շատ շատերը անգթօրէն խողխողուեցին պարզապէս հայ ծնուած լինելու համար: 1915ի Ապրիլի 24ի գիշերը ձերբակալուեց նաեւ բանաստեղծ եւ արձակագիր Ռուբէն Սեւակը, որ Ա. Աշխարհամարտի առաջին ամիսներից որպէս զինուորական բժիշկ, հարիւրապետի աստիճանով ծառայում էր Մաքրիգիւղի զինուորական հիւանդանոցում: Նրան վիճակուեց անցնել մահուան դատապարտուած հայ մտաւորականների ուղիով՝ աքսոր Անատոլիայի խորքերը, տառապագին սպասում եւ բարբարոս խոշտանգում¹²⁷:

Բժիշկների հիմնական նպատակը, նրանց կոչումն է պահպանել մարդուն, սակայն հայերի բնաջնջման ծրագրի հեղինակների ու գլխաւոր կազմակերպիչների մէջ եղել են թուրք բժիշկներ (Նազիմ բէյ, Բեհաէտին Շաքիր): Նրանցից շատերն անձամբ են կատարել ոճիրներ եւ հենց իրենց հայազգի պաշտօնակիցների նկատմամբ¹²⁸: Ու եթէ Ա. Աշխարհամարտի տարիներին հայ բժիշկների մէկ մասի կեանքը խնայուեց, ապա դրա գլխաւոր պատճառը ռազմաճակատում թուրք բժիշկների պակասն էր:

Այսպէս ոչնչացնելով արեւմտահայութեան մարտունակ ուժերը՝ թուրքական կառավարութիւնը իրականացրեց հայերի զանգուածային տեղահանութեան եւ կոտորածի՝ Յեղասպանութեան իր կանխամտածուած ծրագիրը:

Այս կերպ հատուցեցին թուրքերն օսմանեան բանակի զօրացմանը հայերի դարաւոր տքնութեան դիմաց: Նրանք իրենց «երախտագիտութիւնը» շարունակեցին յայտնել՝ հայերին ջնջելով օսմանեան զինուած ուժերի պատմութեան էջերից եւ յայտարարելով, թէ միայն մահմեդականներն ու թուրքերն են արիւն թափել Օսմանեան պետութեան համար, իսկ քրիստոնեաները, նրանց հետ նաեւ հայերը, ազատուած լինելով զինուորական պարտականութիւնից, հարստացել են եւ բարգաւաճել: Սակայն անժխտելի պատմական փաստերը խօսում են այն մասին, որ հայերն իրրեւ զինուոր, արհեստաւոր, մատակարար, բժիշկ ու պաշտօնեայ, դարեր շարունակ ծառայել եւ մշտապէս ներկայ են եղել օսմանեան բանակում եւ իրենց մեծ նպաստն են բերել նրա զօրացմանը:

ԾԱՆՕԹԱԳՐՈՒԹԻՒՆՆԵՐ

¹ Յակոբ Սիրունի, Պոլիս եւ իր Դերը, Ա. հատ., Պէյրութ, Տպ. Մեսրոպ, 1965, էջ 434:

- ² Մանուէլ Զուրաբեան, «Դեւչիրմէն» (Մանկահաւաքը) Օսմանեան Կայսրութեան մէջ ըստ Թուրքական եւ Հայկական Աղբիւրների», Պատմաբանասիրական Հանդէս, 1959, թիւ 2-3 (5-6), էջ 247-256:
- ³ Մանուէլ Զուրաբեան, Զարայիների Ծարժուժը եւ Հայ Ժողովրդի Վիճակը Օսմանեան Կայսրութեան մէջ (XVI-XVII Դարեր), Երևան, ՀՍՍՀ ԳԱ, 1966, էջ 99-100:
- ⁴ Արտակ Շաքարեան, «Արեան Հարկը» Օսմանեան Կայսրութիւնում Դեւչիրմէ, Երեւան, 2006, էջ 38:
- ⁵ Նոյն, էջ 126-129:
- ⁶ Արշակ Արսոյանեան, Պատմութիւն Կեսարիոյ Հայոց, Բ. հտր., Գահիրէ, Տպ. Փափագեան, 1937, էջ 1919-1921:
- ⁷ Նուպար Տէր Միրալէիան, Նշանաւոր Հայագրի Մարդիկ, Պէյրութ, Տպ. Հայ Տիպ Բովարկերաֆ-Թեքնոփրէս, 1988, էջ 142:
- ⁸ Գէորգ Բամպուքեան, «Հայոց Մասայութիւնը Թուրք Պետութեան եւ Մշակոյթի», Եղակաթ, 1962, թիւ Բ., էջ 55:
- ⁹ Արշակ Արսոյանեան, Պատմութիւն Մարաթիոյ Հայոց, Պէյրութ, Տպ. Սեւան, 1961, էջ 1264-1266:
- ¹⁰ Արշակ Արսոյանեան, Պատմութիւն Կեսարիոյ, էջ 1532-1534:
- ¹¹ «Սինան Ծարտարապետին Հայութիւնն Ապացուցուած», Անահիտ, 1931, թիւ Գ-Դ., էջ 165-166:
- ¹² Արմէն Զարեան, «Ծարտարապետ Սինան», Գարուն, Երևան, 1991, թիւ Ա., էջ 92-94:
- ¹³ Գ. Հնասէր, «Օսմանեան Բանակի Հայ Զինուորներ, Ա. Յամաքային Բանակ», Հայաստանի Կոչնակ, 1926, թիւ 42, էջ 1448-1449:
- ¹⁴ Արշակ Արսոյանեան, «Կիպրոս Կղզին (իր Անցեալն ու Ներկան)», Թէոզիկ, Ամէնուն Տարեցոյցը, 1927, էջ 219:
- ¹⁵ Սարգիս Գ. Փաշաեան, Եուզամատեան Ռոտոսթոյի Հայերուն 1606-1922, Երկրորդ եւ յրացեալ Հրատարակութիւն, Պէյրութ, Տօնիկեան, 1971, էջ 45-47, նաեւ՝ Տէր Միրալէիեան, էջ 158, նաեւ՝ Յարութիւն Մրմրեան, Մասնական Պատմութիւն Հայ Մեծատուններու 1400-1900, Բ. տպագրութիւն, յարդարեալ եւ կրկնապատկեալ, Կ. Պոլիս, Օ. Արզուման, 1909, էջ 72-73:
- ¹⁶ Գ. Հնասէր, «Օսմանեան Բանակի Հայ Զինուորներ, Բ. Մովսէյին Բանակ», Հայաստանի Կոչնակ, 1926, թիւ 43, էջ 1480-1481:
- ¹⁷ Փաշաեան, էջ 45-47:
- ¹⁸ Տէր Միրալէիան, էջ 156:
- ¹⁹ Մրմրեան, էջ 72-73:
- ²⁰ Գ. Հնասէր, «Օսմանեան Բանակի», Հայաստանի Կոչնակ, 1926, թիւ 43, էջ 1449:
- ²¹ Սաժակ, Հարկերը Տաճկաստանում, Բաքու, 1904, էջ 24:
- ²² Հայ Ժողովրդի Պատմութիւն, Դ. հտր., Երևան, Հայկ. ՍՍՀ ԳԱ Հրատարակչութիւն, 1972, էջ 113:
- ²³ Լեւոն Վարդան, Հարկերը Օսմանեան եւ Պարսկական Կայսրութիւններուն մէջ ԺԾ-Ի-Դար, Երևան, Գրականութեան եւ Արուեստի Թանգարան, 2004, էջ 471-483:
- ²⁴ Գ. Հնասէր, «Կորսուելու Ենթակայ Վաւերաթուղթեր», Բազմալէզ, 1934, թիւ Ա., էջ 34-35:
- ²⁵ Ալրերտ Սառաւեան, Կոստանդնուպոլիսի Հայ Գաղթօջախը (ԺԾ-ԺԷ-դդ), Երևան, Երևանի Համալսարանի Հրատարակչութիւն, 2007, էջ 298:
- ²⁶ Հնասէր, «Կորսուելու», էջ 34:

- 27 Լեւոն Վարդան, Հարկերը, էջ 478:
- 28 Հայ Ժողովրդի Պատմութիւն, էջ 115:
- 29 Պառատեան, էջ 265-266:
- 30 Ալլոյաճեան, Պատմութիւն Կեսարիոյ, էջ 1028-1029:
- 31 Հայ Ժողովրդի Պատմութիւն, էջ 307:
- 32 Նոյն, էջ 287:
- 33 Թորոս Ազատեան, «Հայ Պաշտօնատարներ Թուրքիոյ մէջ, Առաքել Տատ Ամիրա», Մարմարա, 1944, թիւ 353:
- 34 Թորոս Ազատեան, Տատեան Գերդաստանը եւ իր Ականաւոր Դէմքերը, Խտանպուլ, «Աստղաբերդ» ամսագրէն արտատպուած, «Մշակոյթ» մատենաշար, թիւ 18, Տպարան «Վարօ», 1952:
- 35 Արծուի Բախչինեան, Հայագրի Գործիչներ Հնագոյն Ժամանակներից մինչեւ մեր Օրերը, Երեւան, Չանգակ-97, 2002, էջ 145:
- 36 «Ազգագրութիւն Տէմիրճիպաշեանց», Հանդէս Ամսօրեայ, 1900, թիւ Ա., էջ 51-54:
- 37 Մրմրեան, էջ 146:
- 38 Յովհաննէս Տէր Պետրոսեան, Հայերու Սատարը Թուրք Մշակոյթին եւ Տնտեսութեան, Գահիրէ, 1976, էջ 52:
- 39 Դմիտրի Երեմէեւ, Թուրքերի Մագուճը, Երեւան, «Հայաստան», 1975, էջ 235:
- 40 Լեւոն Զորմիսեան, Համապատկեր Արեւմտահայոց Մէկ Դարու Պատմութեան, Ա. Հտր., Պէյրութ, Կ. Տօնիկեան Հրատարակչատուն, 1972, էջ 150:
- 41 Առաքել Քէչեան, Ակն եւ Ակնցին, Ա. Հտր., Պուքրէշ, 1942, էջ 272:
- 42 Ալլոյաճեան, Պատմութիւն Կեսարիոյ, էջ 1929:
- 43 Վահան Զարդարեան, Յիշատակարան Տարեգիրք 1942 Տարւոյ, Գահիրէ, Նոր շարք, Բ. տարի, 1941, էջ 6:
- 44 Յակոբ Սիրունի, «Էջեր Մանուկ Բէյի Կեանքէն», Բանբեր Հայաստանի Արխիւների, 1969, թիւ Գ., 1970, թիւ Բ.-Գ.:
- 45 Յակոբ Սիրունի, Պոլիս եւ իր Դերը, Բ. Հտր., Պէյրութ, Տպ. Մեսրոպ, 1969, էջ 56-59:
- 46 Վահէ Հայկ, Պարբերդ եւ Անոր Ոսկեղէն Դաշտը-Յուշամատեան Պատմական, Մշակութային եւ Ազգագրական, Նիւ Եորք, 1959, էջ 885-886:
- 47 Առաքել Պատրիկ, Պատմագիրք Յուշամատեան Սերաստիոյ եւ Գաւառի Հայութեան, Բ. Հտր., Նիւ Եորք, 1983, էջ 289:
- 48 Արշակ Ալլոյաճեան, Պատմութիւն Եւզոպիոյ Հայոց, Գահիրէ, «Նոր Աստղ», 1952, էջ 1667:
- 49 Կենսագրութիւն, «Գրիգոր էֆ. Շապանեան», Հանդէս Ամսօրեայ, 1890, թիւ ԺԲ., էջ 255-257:
- 50 Վահէ Հայկ, էջ 658:
- 51 «Նշանաւոր Վախճանեալներ», Ընդարձակ Օրացոյց Ս. Փրկիչեան Հիւանդանոցի Հայոց, 1908, էջ 438-439:
- 52 Վահրամ Թորգոմեան, «Կենսագրական Մանուէլ Բժիշկ Շաշեան», Հանդէս Ամսօրեայ, 1894, թիւ Դ., էջ 118:
- 53 Արշակ Ալլոյաճեան, «Ազգային Սահմանագրութիւնը իր Մագուճը եւ Կիրառութիւնը», Ընդարձակ Օրացոյց Ս. Փրկիչեան Հիւանդանոցի Հայոց, 1910, էջ 177:
- 54 «Օսմանեան Տէրութեան Հայ Աստիճանաւորները», Ընդարձակ Օրացոյց Ս. Փրկիչեան, 1908, էջ 147-149:

- ⁶⁶ Յակոբ Սիրունի, *Պոլիս եւ իր Դերը, Դ. Հար., Անթիլիաս, Տպ. Կաթողիկոսութեան Հայր Մեծի Տանն Կիլիկիոյ*, 1988, էջ 294.
- ⁶⁶ Ա. Ն. Մեղպուրեան, *Հայ եւ Մագուսոյ Հայ Բժիշկներ (1688-1940)*, Ա. Հար., Իսթանպուլ, 1950, էջ 164-167.
- ⁶⁷ Վրէն Բժիշկ, «Թուրք Բժշկական Վարժարանին Հայ Դասախօսները, Տօքո. Անդրանիկ Բաշա Կրճիկեան», *Դարժան*, 1920, թիւ Ը.-Թ., էջ 128-129.
- ⁶⁸ Վահրամ Թորգոմեան, «Հարիւրամեակ Մենդեան Տօքո. Ստեփան Բաշայի Ասլանեան», *Հարաստանի Կոչնակ*, 1931, թիւ 33, էջ 1637.
- ⁶⁹ Վրէն Բժիշկ, «Թուրք Բժշկական Վարժարանին Հայ Դասախօսները, Ստեփան Փաշա Ասլանեան», *Դարժան*, 1920, թիւ Ե., էջ 77-78.
- ⁶⁹ Վահրամ Թորգոմեան, «Ստեփան Փաշա Ասլանեան», *Հանդէս Ամսօրեայ*, 1905, թիւ Գ., էջ 75-79, թիւ Դ., էջ 111-113, թիւ Ե., էջ 142-149, թիւ Զ., էջ 177-186, 1908, թիւ Գ., էջ 67-70.
- ⁶¹ Վահրամ Թորգոմեան, «Բժիշկ Տոքթ. Գարրիէլ Փաշա Սեւեան», *Հանդէս Ամսօրեայ*, 1899, թիւ Զ., էջ 167-173.
- ⁶² Սիրունի, *Պոլիս, Դ. Հար.*, էջ 256.
- ⁶³ Մեղպուրեան, *Հայ եւ Մագուսոյ Հայ Բժիշկներ*, էջ 171-172.
- ⁶⁴ Գ. Մ. Կարոյեան, *Մեծ Եղեռնի Նահատակ Հայ Բժիշկները (Անոնց Պատգամները)*, Պոսթոն, 1957, էջ 177.
- ⁶⁵ Նոյն, էջ 185-187.
- ⁶⁶ Սիրունի, *Պոլիս, Դ. Հար.*, էջ 260.
- ⁶⁷ Վրէն Բժիշկ, «Թուրք Բժշկական Վարժարանին Հայ Դասախօսները, Տօքո. Վահան Բաշա Մանուէլեան», *Դարժան*, 1920, թիւ Ը.-Թ., էջ 132.
- ⁶⁸ Ալպօյաճեան, *Պատմութիւն Կեսարիոյ*, էջ 2091-2092.
- ⁶⁹ «Նշանաւոր Վարժանեալներ, Վահան Բաշա Մանուէլեան», *Ընդարձակ Օրացոյց Ս. Փրկիչեան*, 1908, էջ 413.
- ⁷⁰ Վրէն Բժիշկ, «Թուրք Բժշկական Վարժարանին Հայ Դասախօսները, Անդրանիկ Բաշա Նաֆիլեան», *Դարժան*, 1920, թիւ Թ.-ԹԱ., էջ 152-153.
- ⁷¹ Վարդ Շիկաչեր, «Կէսդարեան Պատմութիւն Իսթանպուլահայ Բժշկութեան մեր Բժիշկները Հանրապետական Երջանին», *Շողակաթ Տարեգիրք*, 1974-1975, Իսթանպուլ, 1975, էջ 43.
- ⁷² Նոյն, էջ 46-47.
- ⁷³ Վրէն Բժիշկ, «Թուրք Բժշկական Վարժարանին Հայ Դասախօսները. Տօքթ. Յակոբ Պէլ Տաւուտեան», *Դարժան*, թիւ Գ-Դ., էջ 14-15.
- ⁷⁴ Վահրամ Թորգոմեան, «Բժիշկ Տօքթ. Յակոբ Տաւուտեան 1812-1878 Կենսագրութիւն», *Հանդէս Ամսօրեայ*, 1898, թիւ Գ., էջ 74-78.
- ⁷⁵ Վահրամ Թորգոմեան, «Բժիշկ Տօքթ. Գասպար Պէլ Սինապեան», *Հանդէս Ամսօրեայ*, 1896, թիւ ԺԲ., էջ 330-340.
- ⁷⁶ Վրէն Բժիշկ, «Թուրք Բժշկական Վարժարանին Հայ Դասախօսները, Տօքթ. Գասպար Բէլ Սինապեան», *Դարժան*, 1920, թիւ Ա-Բ., էջ 16.
- ⁷⁷ Վահրամ Թորգոմեան, «Բժիշկ Տօքո. Մկրտիչ Բառլատեան», *Հանդէս Ամսօրեայ*, 1899, թիւ Ժ., էջ 370-371.
- ⁷⁸ Շիկաչեր, էջ 97-107.
- ⁷⁹ Վահրամ Թորգոմեան, «Բժիշկ Բարունակ Բէլ Բոթիկեան», *Հանդէս Ամսօրեայ*, 1895, թիւ Ժ., էջ 310-316 եւ թիւ ԺԲ., էջ 360-370.

- ⁸⁰ Վրէն Բժիշկ, «Թուրք Բժշկական Վարժարանին Հայ Դասախօսներ, Տօքոս-Յակոբ Պէյ Յովհաննէսեան», Դարժան, 1920, թիւ Ա-Բ, էջ 15:
- ⁸¹ Երկաշեր, էջ 203:
- ⁸² Վրէն Բժիշկ, «Թուրք Բժշկական Վարժարանին Հայ Դասախօսները, Տօքոս-Յակոբ Պէյ Խանտանեան», Դարժան, 1920, թիւ Է., էջ 107-108:
- ⁸³ Մեղպուրեան, Հայ եւ Մագուսով Հայ Բժիշկներ, էջ 195:
- ⁸⁴ Հ. Բ. Սարգիսեան, «Կոմիտաս Պէյ Մինասեան», Բաղմալէպ, 1904, թիւ Է., էջ 326-334:
- ⁸⁵ Արշակ Արաօյանեան, Պատմութիւն Կեանքի, էջ 2086:
- ⁸⁶ Վրէն Բժիշկ, «Թուրք Բժշկական Վարժարանին Հայ Դասախօսները, Տօքոս-Յակոբ Պէյ Խանտանեան», թիւ Է., էջ 107-108:
- ⁸⁷ Վրէն Բժիշկ, «Թուրք Բժշկական Վարժարանին Հայ Դասախօսները, Տօքոս-Յովհաննէս Պէյ Թապիպեան», Դարժան, 1920, թիւ Ը.-Թ., էջ 153:
- ⁸⁸ Արաօյանեան, Պատմութիւն Կեանքի, էջ 2097-2098:
- ⁸⁹ Երկաշեր, էջ 49
- ⁹⁰ Նոյն, էջ 56
- ⁹¹ Նոյն, էջ 49
- ⁹² Նոյն, էջ 149
- ⁹³ Կարոյեան, էջ 137-140
- ⁹⁴ Երկաշեր, էջ 44:
- ⁹⁵ Վահրամ Թորգոմեան, «Թուրք Անասնարուժական Վարժարանին Հայ Դասախօսները-Տօքոս-Մինաս Պէյ Աւետիսեան», Դարժան, 1921, թիւ Գ.-Դ., էջ 34-35:
- ⁹⁶ Հ. Պ. Զ., «Կենսադրութիւն Յովսէփ Վարդան Փաշա», Հանդէս Ամսօրեայ, 1890, թիւ Գ., էջ 62-63:
- ⁹⁷ Արշակ Արաօյանեան, «Յովսէփ Վարդան Փաշա», Երիտասարդ Հայուհի, 1954, թիւ Բ., էջ 15-19:
- ⁹⁸ Թորոս Ազատեան, «Յովսէփ Վարդան Փաշայի Մահուան 75ամեակը, Անտեսուած Դրուագներ իր Կեանքին», Ժամանակ, Ստամբուլ, 1954, թիւ 16871, 16878, 16885:
- ⁹⁹ Եփրեմ Պօղոսեան, «Թրնկրեան Գերդաստանը», Հանդէս Ամսօրեայ, 1951, թիւ Գ.-Է., էջ 254-282 եւ 428-459:
- ¹⁰⁰ Միրունի, Պոլիս, Դ. Հար., էջ 295-296:
- ¹⁰¹ «Թորոս-Գիսակ Պէյ», Արարատ, 1873, թիւ Է., էջ 280:
- ¹⁰² Եփրեմ Պօղոսեան, «Կարապետ Արթին Փաշա Տաւուսեան Կուսակալ եւ Ընդհանուր Կառավարիչ Լիրանանի», Հանդէս Ամսօրեայ, 1949, թիւ Ա.-Գ., էջ 54-100:
- ¹⁰³ Հ. Յ. Յ. «Կարապետ Տաւուս Փաշա Արթինեան», Հանդէս Ամսօրեայ, 1964, թիւ Ժ.-ԺԲ., էջ 542-550:
- ¹⁰⁴ Միսակ Յակոբ Վարժապետեան, Հայերը Լիրանանի մէջ, Ա. Հար., Պէյրուս, Բ. տպ., Համազգայինի Վահէ Սէթեան Տպարան, 1982, էջ 212:
- ¹⁰⁵ Եփրեմ Պօղոսեան, «Յովհաննէս Փաշա Գուլումեան Վերջին Հայազգի Կառավարիչ Լիրանանի», Հանդէս Ամսօրեայ, 1951, թիւ Ա.-Բ., էջ 83-93:
- ¹⁰⁶ Վարժապետեան, էջ 192-214:
- ¹⁰⁷ Վահրամ Թորգոմեան, «Թուրք Բժշկական Վարժարանին Հայ Դասախօսները, Յովսէփ Զէյլալեան», Դարժան, թիւ ԺԲ., էջ 166, նաեւ՝ Ա. Ն. Մեղպուրեան, Հայ եւ Մագուսով Հայ Բժիշկներ, Այրուրէնական Համալսարան Անուանացանկ (1688-1940), Իսթանպուլ, 1940, էջ 116:

- ¹⁰⁹ Լէօ. Երկերի ժողովածու, Գ. Հոր., Երևան, «Հայաստան», 1969, էջ 237.
- ¹⁰⁰ Լէօ. Երկերի ժողովածու, Դ. Հոր., Երևան, «Հայաստան», 1984, էջ 107-108.
- ¹¹⁰ Ալփոյան, «Ազգային Սահմանադրութիւնը», էջ 176.
- ¹¹¹ Լեւոն Վարդան, Հարկերը, էջ 483-484.
- ¹¹² Եակոբ Սիրունի, Պոլիս, Բ. Հոր., էջ 360-366.
- ¹¹³ Հայ ժողովրդի Պատմութիւն, էջ 307.
- ¹¹⁴ Խաչիկ Սարաջեան, Հայոց Դերը Թուրքիոյ մէջ, Երևան, 2000, էջ 25.
- ¹¹⁵ «Զինուորագրութիւնը Թուրքիայում», Մշակ, Թիֆլիս, 1877, թիւ 42, 48, 63, 93, 95.
- ¹¹⁶ Եակոբ Սիրունի, Պոլիս Եւ Իր Դերը, Գ. Հատոր, Անթիլիաս, Տպարան Կաթողիկոսութեան Հայոց Մեծի Տանն Կիլիկիոյ, 1987, էջ 514-515.
- ¹¹⁷ «Հայոց Զինուորական Մտառութեան Հարցը Տանկաստանում», Մշակ, Թիֆլիս, 1878, թիւ 6.
- ¹¹⁸ Ալփոյան, «Ազգային Սահմանադրութիւնը», էջ 170-172.
- ¹¹⁹ Վահէ Հայկ, էջ 661-662.
- ¹²⁰ Գ. Միրզէնեան, Տանկահայ Զինուոր եւ Զինուորականութիւնը, Պէյրութ, Տպարան Համազգային, 1967, էջ 12.
- ¹²¹ Արամ Անտոնեան, Պատկերազարդ Ընդարձակ Պատմութիւն Պայքանեան Պատերազմին, Կ. Պոլիս, 1912-1913, էջ 890-893.
- ¹²² Այլ տուեալներով՝ մինչեւ 300 հազար:
- ¹²³ Ալփոյան, Պատմութիւն Մայրաթիոյ, էջ 927.
- ¹²⁴ Զոն Կիրակոսեան, Առաջին Համաշխարհային Պատերազմը եւ Արեւմտահայութիւնը 1914-1916 թթ., Երևան, «Հայաստան», 1967, էջ 259-273.
- ¹²⁵ Լեւոն Վարդան, Ժամանակագրութիւն Հայկական Տանհինգի 1915-1923, Պէյրութ, Ատրաս, 1975, էջ 29.
- ¹²⁶ Արամ Անտոնեան, Մեծ Ռեֆրը, Հայկական Վերջին Կատարածները եւ Թալիպի Փաշա, Երևան, Արեւիկ, 1990, էջ 232-233.
- ¹²⁷ Էդուարդ Զրբաշեան, Թուրքի Մեւակ, Երևան, Միտք Հրատարակչութիւն, 1965, էջ 103.
- ¹²⁸ Հայ Բժշկութեան Տուած Զոհերը. Յուցակագրուած Վաւերական Փաստերով, Կ. Պոլիս, 1919, տպգր. «Արձագանգ»-ի, էջ 5-6.

THE ARMENIANS IN THE OTTOMAN ARMY
(AN OVERVIEW FROM THE XIV CENTURY TO 1918)

(Summary)

ANAHIT ASTOYAN

As untrustworthy elements, the Christians of the Ottoman Empire were not recruited by the army. Moreover, according to the Shariaa law, as infidels, they were not entitled to fight in the army of the believers. However, in order to use the military capability of these Christians and due to the increasing needs of the army, the Ottoman authorities forcefully recruited the strongest, most handsome, healthy and clever Christian teenagers and, after forced islamization, sent them to the Janissaries' units.

It is not clear how many of the Janissaries were Armenians. For three centuries, however, the *devshirme* system appropriated the best of the Armenian generations from their natural milieu to serve the Ottoman Empire and its religion.

The Armenians served in the land and sea units of the Ottoman army in different ways. Concurrently, throughout centuries, the financial contribution of the Christians to the strengthening of the Ottoman army was huge. This was done through taxes and levies, which Muslims did not have.

The basic provisioners of the Ottoman army were Armenian merchants. On another note, for centuries, large numbers of Armenian artisans permanently served the Ottoman land and sea military units. These merchants and artisans were an inseparable part of the army and accompanied it during military action.

As a result of the provisions of the *Tanzimat* (promulgated in 1839) and due to the scarcity of Turkish physicians, as of the mid-19th century Armenian physicians were given the chance to serve the Ottoman army. Some 170 high ranking Armenian officers were awarded the titles of bey and pasha. Other Armenians serving in other power holding ministries, as well as the Armenian governors of Mount Lebanon, were awarded these highest military titles too.

Military career was made available to the Armenians in 1908 with the proclamation of the Ottoman Constitution, under which Armenians and other Christian representatives of the Ottoman parliament demanded that military service in the Ottoman army should be equal to all. Both during the Balkan War and WWI Armenian soldiers fought courageously and were acknowledged by high Turkish military officers. However, during WWI, to implement their preplanned massacre of the Armenians, the Turkish authorities annihilated the militarily-able Armenians.

Turkish historiography denied the centuries-old Armenian effort to strengthen the Ottoman army and claimed that only the Turks and the other Moslem peoples of the Ottoman Empire fought for the Ottoman state. However, the above-mentioned undeniable facts show that Armenians as soldiers, artisans, provisioners, physicians and state administrators served in the Ottoman army for centuries and contributed to its strengthening.



Ստեփան փաշա Ասլանեան



Թորոս բէյ Գիսակ



Յովհաննէս փաշա Գոյումճեան



Գրիգոր քէյ Թագուորեան



Անտոն Եաւեր փաշա
Թընկըրեան



Անդրանիկ փաշա Կրճիկեան



Վահան փաշա Մանուէլեան



Կոմիտաս քէյ Սինասեան



Մանոկ քէյ Սիրգայեան



Անտոն փաշա Նափիեան



Տիգրան փաշա Պապայեան



Գաբրիէլ փաշա Սեւեան



Գասպար քէյ Սինապեան



Յովսէփ Վարդանեան
(Վարդան փաշա)



Կարապետ փաշա Տառուտեան



Յակոբ քէյ Տարմատեան
(Տարմատ քէյ)



Յակոբ քէյ Տարմտեան



Արթին քէյ Տելէթեան



Տիրան փաշա Փափազեան



Տիգրան փաշա Փեշտիմալճեան



Բարունակ քէյ Ֆերուխան



Յակոբ Սիրունին (ներքետում, ձախից երրորդը) օսմանեան բանակի պահեստի հայ սպաների հետ, 1914 թ.



Հարբիէի Չինուորական Վարժարանի սերաստացի հայ ուսանողներ



Հարբիէի Չինուորական Վարժարանի հայ ուսանողներ